

河南郡志卷之三十一

東嘉陳宣監修

洛陽喬縉編集

古滕崔譽

東鄆厲仲彰

同校

御製祭文

祭中嶽文

維洪武三年歲次庚戌七月丁亥朔越五日辛卯  
皇帝制曰磅礪中國之中參穹靈秀生同

天地形勢巍然古昔帝王登之察地利以安生民故  
祀之曰嵩山於敬則誠於禮則宜自唐始加神  
之封號歷代相因至今曩者元君失馭海內鼎沸  
生民塗炭予起布衣承

上天后土之命百神陰佑削平暴亂正位稱尊職當  
奉

天地享鬼神以依時統一人民法當式古今寰宇既  
清特修祀儀因神有歷代之封號予起寒微詳  
之再三畏不敢效蓋神與穹壤同始靈鎮中央其  
來不知歲月幾何神之所以靈人莫能測其職

必受命於

上天右土為人君者何敢預言而恨不敢加號特以

中嶽嵩山名其依時祀

神維

神鑒之尚饗

祭漢光武文

維洪武四年歲次辛亥正月乙酉朔越十有八日

壬寅

皇帝謹遣秘書監丞陶誼致祭于

漢世祖先武皇帝之陵曩者有元夫馭天下紛紜  
朕由茲集衆平亂統一天下今已四年矣稽古典  
自堯舜繼天立極列聖相傳為蒸民主者陵各有

在雖去古千百餘載時君當修祀之朕與百神之  
祀故遣官齎牲醴奠祭修陵君靈不昧尚惟歆享

祭宋太祖文

維洪武三十五年歲次壬午七月壬午朔越十五  
日丙申

皇帝謹遣道士姜仕濱沈真致祭于宋太祖皇  
帝曰自古有天下功德及民者當享百世之祀我  
國家崇祀古昔帝王厥有常典今朕遵承  
祖訓奉天征討即位之初永惟聖帝明王陵寢所在  
不可不敬是用奉齎幣牲醴以祭惟皇有治世

之功有安民之德歷世雖遠神  
玄化孚佑下民俾臻太平之福

止其尚默  
被祀萬世無

數尚享

祭中嶽文

維永樂元年歲次壬午七月壬午朔  
十五日丙申

皇帝遣道士姜仕濱沈真致祭于

中嶽嵩山之神曰惟神職司中央  
于天地中和之  
氣雨暘時若災沴不興神功有焉  
載在祀典歷代  
咸遵惟我

太祖高皇帝以神武定天下崇奉祭洋洋感格三十餘年黎庶雍熙建文昏愚奸臣竊柄神明弗佑四海離心朕奉

祖訓來清群惡荷

天地山川之靈戰無不捷堂堂之陣直抵京師豈期建文闔宮自燼朕以諸王大臣再三推戴於六月十七日躬即帝位王承

高皇帝大業既以昭告於

天地社稷必當徧告於

名山大川茲特遣官祭以牲醴惟神有知體朕

失調易於感疾子夙夜人心此寢食弗寧萬冀神靈鑒予誠悃聞於

上帝賜以洪休潛消瘴癘于降清涼使將士安寧百疾不作特令人致香幣牲醴詣神所祭告尚享祭中數文

維洪熙元年歲次乙巳二月辛丑朔越十五日乙卯

皇帝遣大理寺右寺丞楊慎致祭于

中嶽嵩山之神曰巖巖曰回嶽永鎮中土時出雲雨用育萬物嗣位之初率薦告祀翼我

皇祚尚賴神庥尚享

祭伊厲王文

維洪熙元年歲次乙巳二月辛丑朔越十五日乙

卯

皇帝謹遣大理寺寺丞楊復致祭于

叔伊厲王曰惟

叔於

皇考同氣兄弟嗣位之初篤念親親遣人致祭惟歆

鑒之尚享

祭漢光武文

維洪熙元年歲次乙巳二月辛丑朔越十五日乙

卯

皇帝遣太常寺寺丞袁正安致祭于

漢光武皇帝曰惟

帝漢之令主有德有功被于生民光于簡冊子嗣

位之始率循典章祗遣廷臣敬脩陵寢惟

帝歆鑒尚享

祭宋太祖文

維洪熙元年歲次乙巳二月辛丑朔越十五日乙

卯

皇帝遣太常寺少卿王羽致祭于

宋太祖皇帝曰惟

帝宋之令主有德有功被于生民光于簡冊予嗣位之始率循典章祇遣廷臣敬脩陵寢惟

帝歆鑒尚享

祭中嶽文

維宣德元年歲次丙午二月乙丑朔越十一日乙

亥

皇帝遣都察院右都御史王彰致祭于

中嶽嵩山之神曰惟 神永奠中土阜成民物參

贊之功國有賴焉予嗣位之初特用祭告 神其

昭鑒惠我邦家尚享

祭伊厲王文

維宣德元年歲次丙午二月乙丑朔越十一日乙

卯

皇帝遣都察院右都御史王彰致祭于

叔祖伊厲王曰仰惟

叔祖宗室至親茲承大統之初謹用祭告尚享

祭漢光武文

維宣德元年歲次丙午二月乙丑朔越十一日乙

亥

皇帝遣都察院右都御史王彰致祭于

漢光武皇帝曰惟

帝中興漢室奠安生民功德之隆光

昭後世茲予祇承天序謹用祭告尚享

祭宋太祖文

維宣德元年歲次丙午二月乙丑朔越十一日乙

亥

皇帝遣翰林院編脩周叙致祭于

宋太祖皇帝曰惟

帝統承先業保乂邦家民賴以安功德惟茂予嗣

位之初特用祭告尚享

祭漢光武文

維正統元年歲次丙辰止月丁卯朔越十五日丁

巳

皇帝遣禮科給事中李性致祭于

漢光武皇帝曰惟

帝再造家國有致治之功民用以寧予承大統謹

用祭告惟帝饗之

祭宋太祖文

明志卷三十一  
八  
維正統元年歲次丙辰正月丁卯朔越十五日丁巳

皇帝遣新寧伯譚璟致祭于

宋太祖皇帝曰惟

帝濟時之艱有致治之功民用以寧予承大統謹用祭告惟帝饗之

祭中嶽文

維正統九年歲次甲子二月庚申朔越二十四日癸卯

皇帝謹遣翰林院編脩陸垿祭告于

中嶽嵩山之神曰予奉

天育民愧涼于德致茲久旱災及群生夙夜省躬中心惓切神司方嶽憂憫諒同雨農以時宜任其責特茲致禱尚冀感通弘布甘霖用臻豐稔匪予之惠時乃神庥尚享

祭中嶽文

維景泰元年歲次庚午閏正月丙午朔越十五日庚申

皇帝謹遣工科給事中奚倫致祭于

中嶽嵩山之神曰越茲中土嵩嶽惟崇民物奠安



厥功允茂予嗣承大統謹用祭告惟神歆格永佑邦家尚享

祭伊厲王文

維景泰元年歲次庚午閏正月丙午朔越十五日庚申

皇帝謹遣工科給事中奚倫致祭于

曾叔祖伊厲王曰予嗣承大統追惟宗親謹用祭告伏維尚享

祭漢光武文

維景泰元年歲次庚午閏正月丙午朔越十五日

庚申

皇帝謹遣工科給事中奚倫致祭于

漢光武皇帝曰惟

帝再造邦家有致治之功民用以寧予承大統謹用祭告惟帝享之

祭中嶽文

維成化元年歲次乙酉三月戊申朔越二十二日巳巳

皇帝遣兵科給事中袁愷致祭于

中嶽嵩山之神曰惟神毓秀鍾靈永表中土莫

安民物萬世允賴茲丁嗣承大統謹用祭告神  
其歆鑒佑我 國家尚享

祭中嶽文

維弘治元年歲次戊申四月甲午朔越二十二日  
乙卯

皇帝遣武安侯鄭英致祭于

中嶽嵩山之神曰惟 神無秀鍾靈永表中土奠  
安民物萬世允賴茲予嗣承大統謹用祭告 神  
其歆鑒佑我 國家尚享

周府祭中嶽文

維洪武十四年歲次辛酉十二月辛亥朔

周王謹遣引禮舍人程本立致祭于

中嶽嵩山之神曰惟 神作鎮中土表正四方固  
我封域與國無疆茲者欽承

上命世守周邦之國之初禮當昭告謹以牲醴致祭  
伏惟鑒知尚饗

古今祭文

祭河陽喬玄文

魏曹操

玄居河南有盜持杖劫執其幼子入舍登樓就玄  
求貨玄不與有頃司隸尉陽球率河南丞洛陽令

圍守玄家球等恐并殺其子未敢迫之玄瞑目呼曰姦人無狀玄豈以子之命而縱國賊乎從令兵於是攻之玄子亦死玄乃指闕謝罪乞下天下九有劫貨皆并殺之不得贖以財寶開張燕路詔書下其章初曹操微時人莫知者嘗往候玄玄見而異焉謂曰今天下將亂安生民其在君乎操嘗感其知己及後經過玄墓輒悽愴致祭奠自為其文曰故太尉喬公懿德高範沉愛博容國念明訓士思令謨幽靈潛翫愍哉緬矣操以幼年逮升堂室特以頑質見納君子增榮益親皆由獎勗猶仲尼

稱不如顏淵李生厚歡質復士死知己懷此無忘又承從容約誓之心殂沒之後路有經由不以斗酒隻鷄過相沃盥車過三步腹痛勿忘雖臨時戲笑之言非親之篤好胡肯為此辭哉感懷舊事顧念悽愴奉命東征道次鄉里北望黃土乃心陵墓裁致薄奠公其享之

祭田橫墓文

唐韓愈

貞元十一年九月愈如東京道出田橫墓下感橫義高能得士因取酒以祭為文而弔之其辭曰世有曠百世而相感者余不自知其何心非今世之

所稀孰為使余歎歎而不可禁余既博乎天下曷  
有庶幾乎夫子之所為死者不復生嗟余去此其  
從誰當秦氏之敗亂得一士而可王何五百人之  
擾擾而不能脫夫子於劍鉞抑所寶之非賢亦天  
命之有常昔闕里之多士孔聖亦云其遑遑苟欲  
行之不迷雖顛沛其何傷自古死非一夫子至今  
有耿光懸陳辭而薦酒鬼髣髴而來享

吊美弘文

唐柳子厚

有周之裔兮邦國異圖臣乘君則兮王易為侯威  
強逆制兮鬱命轉幽瘞盡膠漆兮肝膽為仇好權

蒙貨兮忘勇以劉伊特云幸兮大夫之羞嗚呼危  
哉河清潰溢兮橫驅以抑嵩高竊侈兮舉手排直  
壓溺之不慮兮堅剛以為式知死不可挽兮明彰  
人極夫何大夫之炳烈兮王不悟夫諛賊卒施快  
於剽校兮恒就制乎強國松栢之斬刈兮薊茸欣  
植盜驪折足兮罷駑抗臆驚鳥之高翔兮孽狐喘  
而不食竊畏忌以群朋兮夫孰病百而伸一挺寡  
以校衆兮古聖人之所難劫援龐以威傲兮茲固  
蹈殆而還安殺身之匪子威兮閔宗周之以完豈  
成城以夸功兮哀清廟之將殘疾虜子之肆誕兮

彌皇覽以為謾姑舍道以從世兮焉用夫考古而  
登覽指白日以致憤兮卒頽幽而不列彼上帝以  
飛精兮黑寥廓而殄絕竭馮雲以和想兮終冥冥  
以鬱結欲登山以號辭兮愈洋洋以超忽涸涸其  
不化兮形凝冰而自慄圖始而慮末兮非大夫之  
操陷瑕委厄兮固哀世之道知不可而愈進兮誓  
不偷以自好陳誠以定命兮侔貞臣以與為交比  
干之仁義類兮緬遼絕以不群伯夷殉潔以莫怨  
兮孰克執其遺塵苟端誠之內虧兮雖耆老其誰  
珍古固有一死兮賢者樂得其死大夫死忠兮君

子吁與嗚呼哀哉敬弔忠甫

祭獨孤中丞文

唐李翱

維太和元年歲次丁未九月庚申朔二十日己卯  
朝散大夫右諫議大夫知制誥李翱謹以清酌庶  
羞之奠敬祭于亡友故福建都團練觀察處置等  
使兼御史中丞獨孤君侍郎之靈嗚呼昔我與君  
自少而歡中暫乖阻周荆眇綿宣城越中二府周  
旋同事於公職以相連予常推後我唱其先叔向  
汝齊不訥而堅籟馨以聞乃在掖垣引我代已真  
謂其賢共升於朝亦又多年或外或內莫余或捐

君齒少我髮鬢都玄豐盈角星一氣茂神全當臻上  
壽福祉昌延何為發瘍針藥痛一綱有妻既喪有子  
童然喪祭誰主銘旌有翩嗚呼哀哉唯短與長會  
歸於死以存悲逝前後皆尔哭君之哀痛折支指  
歆抑不能縱之曷已嗚呼哀哉入君之戶但有裳  
帷思與君言不見容儀薦肉不食酌酒不推嗟嗟  
用晦何亟臻斯嗚呼哀哉尚享

祭伊川先生文

宋張繹

嗚呼利害生於身禮義根於心伊此心喪于利害  
而禮義以為虛也故先生踴躍行斯世而衆

以為迂也惟尚德者以為早絕之行而忠信者以  
為孚也立義者以為不可以化而達權者以為不可  
拘也在吾先生曾何有意心與道合泯然無際無  
歆可以係羈方自克者知甘苦難也不立意以為言  
知言者識其要也德輶如毛猶有倫無聲無臭  
夫何可親嗚呼先生之道不可得而名也伊言者  
反以為病乎此心終不得以形也惟泰山以為高  
兮日月以為明也春風以和兮嚴霜以為清也  
在昔諸儒各行其志或得不數或觀於理學者趣  
之世濟其美獨吾先生淡不無味得味之真死其

乃已自某之見七年于茲。合學化育以蕃以滋。天地其容我乎。父母其生之。丑也。親其臨我。考夫子其成之。歆報之心。何日忘之。元生有言。見于文字者。有七分之一心。繪于丹青者。有七分之儀。七分之儀。固不可益。七分之一心。猶或可。推而今而後。將築室於伊雒之濱。望先生之墓。以畢吾此生也。嗚呼。夫子沒而微言絕。則固不可。而聞也。然天不言而四時行。地不言而百物生。性也。與二三子洗心去智。格物去意。期默契斯道。在元生為未亡也。嗚呼。二三子之志不待物而後見。元生之行不待誅而後

徵然而山頽梁壞。何以寄情。淒風一奠。敬祖于庭。百年之恨。併此以傾。

祭朱給事光庭文

程伊川

嗚呼。道既不明。世罕信者。不信則不求。不求則何得。斯道之所以久不明也。自予兄弟倡學之初。衆方驚異。君時甚少。獨信不疑。非夫豪傑特立之士。能如是乎。篤學立行。至於沒齒。志不渝。如金石。行可質於神明。在家在邦。臨民臨事。造次動靜。一由至誠。上論古人。豈易其比。蹇蹇正臣之節。凜凜循吏之風。著見事為。皆可紀述。謂當大施於時。必得

其壽夭胡難忱遽止於此嗚呼哀哉不幸七八年之間同志共學之想繼而逝今君復往使予踽踽世憂道學之寡助則予之哭君豈特交朋之情而已邗山之陽歸祔先宅思平生之深契痛昔容之永隔陳薄奠以將誠庶英靈兮來格

祭范文正公文

國朝袁錠河南府知府

維正統七年歲次壬戌五月庚申朔越十五日甲戌河南府知府袁錠謹遣推官鄧墳致祭于宋太師中書令魏國文正公將作監簿公丞相忠宣公右丞恭獻公並龍圖學士侍郎之墓曰惟公聰

敏特達英邁絕倫有德有言為宋名臣經畧延慶而西夏畏服秉執國鈞而夙夜惟寅義田義塾而垂光後世敷德施惠而四海同仁名書竹帛照耀古今正統戊午都察院右副都御史姑蘇陳君奉朝命出鎮陝右過洛陽乃訪公墳因命脩理剪除荆榛綿綿瓜瓞維國之禎聞風來祭肅肅雍雍行禮墓下勒碑刻銘崇飭脩葺再拜新祖瑩其等恭備菲儀蓬設陳奠九泉而英靈昭鑒仰千古而德澤愈深尚享

祭河南名宦文

陳宣 知府通後七道



維弘治九年歲次丙辰七月丙午朔越八日癸丑  
河南府知府前刑部郎中東嘉陳宣茲以儒學故  
有文昌祠更之曰名宦以柔毛剛鬣謹致祭以告  
于

漢河南守吳公 魏公 河南尹劉公 袁公

李公 洛陽令董公 唐陝州刺史許公

洛州司馬狄公 東都留守宋公

東都衛國李公 河南行營元師郭公

宋西京留守趙公豐公丞相判河南府寇公

知河南府陳公 翰林學士知陝州范公

使相判河南府王公 西京留守推官歐陽公

元河南宣撫使史公曰礼以義起道在人行秋陽

鵠瞻天下文明學宮之旁他莫敢窺有惻其隱

無毀而成惟滋灑澗周公所營中天地立乃曰

西京自漢而唐宋元相仍宦於斯者金玉之聲

立朝論事刺史專城或忠或義百世儀刑宣來

官茲土感愧殊并高山仰止薄獻一誠尚享

祭河南鄉賢文

維弘治九年歲次丙辰七月丙午朔越八日癸丑

河南府知府前刑部郎中東嘉陳宣茲以故名

宦鄉賢為一祠因文昌之更得專鄉賢名祠以  
柔毛剛鬣謹致祭以告于

夏大夫闞公 周申伯公 仲山甫公

漢留侯張公 太傅賈公 處士周公

晉孝子王公 武侯王公 隋上柱國韓公

唐鄴侯李公 紫薇令姚公 宋魏國范公

文定張公 潞國文公 許國呂公

太中大夫程公 豫國程公 洛國程公

溫國司馬公 康鄴郡公 處士張公

韓國富公 同知樞密院錢公 和靖尹公

忠宣范公 起居 人尹公 集賢院學士朱公

國朝蒲州學正曹公 工部尚書宋公 刑部尚書

耿公曰

夏大夫龍逢其忠兮周生甫而及申魯王元公其  
孝兮迄武侯若隋有韓禽虎之振振漢留侯惟賈  
與周兮唐鄴侯又有姚紫薇之春宋若范公張文  
呂之相業兮程太中大夫衍二子以傳道之真安  
樂富與獨樂園兮富彥國錢宣靖公揆思叔二丑  
氏叔正之純仁揭我

國朝之大明兮羗曹宋耿清惠其人是皆中天地之

所萃兮豈惟嶽而降神之數君子兮道德功業卓卓乎其莫與之倫宣以菲材辱守太郡故求源而不得兮敢開口而輕論忽新秋其氣清兮湛露斯之令辰感精神於寥廓兮奏太和之殷殷邇淵源於千古之上兮採魯侯之一芹尚享

祭中嶽祈雨文 七月十八日

乾上而亢坤上而戰正值愆期之會箕星好風畢星好雨莫為轉旋之機物則不通神妙萬物茲以河南一境災旱連旬百谷將成群黎失望豚蹄每專於致祝所耶未有於滿車豈惟民哉是吾憂也

昨者已率僚吏走告 神祈膏澤雖下於民德施未普於物歆終其惠豈宜泛求竊聞

中嶽嵩山天下重鎮陰陽之所磅礴蛟龍之所隱藏噓氣成雲散之即雨乃若寂然不動誠則感而遂通此歷代已行之明驗而我

朝尤崇信而致隆者也 宣齋宿而後敢言惟吾民之俯念聽卑而能刻應惟吾神之是依特茲牲帛用伸虔告尚享

白龍潭祈雨文 七月十九日 隨俗迎水

惟神久稱靈異有感必通行雲沛雨駕電驅龍竊

啓元造於赫神功赤地如焦會適其逢特茲謁告  
如發祈禱敢借一勺徧作穹窿枯者以秀成者以  
終室家存遠走卒兒童余何事者報德惟崇謹告

謝雨文

七月二十六日

神依人而血食人依神而相生古今通義天地常  
經頃者旱熉為虐士庶惶驚宣等共守茲上心切  
尤誠既禱而應雲雨交盈高黍下稻東作西成伊  
誰之力惟神之靈何以報應謹此特牲尚享

祭陝州周太保召公奭文

時玄帝廟與公祠並立弘治九年知府陳宣去玄帝廟因祭以文

維昔盛時周室興隆天遺賢相扶日之中自陝以

西棠陰悒悒勿剪勿伐豈曰詞工二南之始百世  
之風廟食茲土崇德報功謹具牲帛秉彛所同以  
李劉孫姚范而配于公尚享

祭登封鄉賢祠文

暨文昌祠改置此祠  
十年四月二十九日

周甫侯

申伯

鄭純孝伯考叔

唐少室山

人李渤四賢祭以文曰山川之秀氣不鍾為異物  
則鍾而為異人故天不愛道而惟嶽降神地不愛  
寶而生甫及申或純孝而有垂於後世或價高而  
亦動于縉紳是皆理與氣之相符夫豈偶然而無  
所因頃者於學宮之旁去其淫祀者而正以吾儒

之真天下同歸吾道一信尚享

祭吏部尚書耿公靈柩過河南文

惟公以天下之才而育天下之才以天下之賢而用天下之賢此公之德業聞望所以卓卓於時未有或之能先者乃若闕天下之禮振天下之威特公餘事而亦所優為者奚足為公而便便世有父子科第而袍笏相傳者公先君子刑部尚書清惠公毅然獨立而公繼之父子尚書橋梓參天視彼夸名譽而垂休光者吾固知不得與公而比肩先尚書公以清白起家而公尚書三部歷官四十餘

年門無苞苴之客家止琴鶴之憐公之為人自信而人信之蓋未占有孚豈獨得乎人心之同然夫何天不憇遺士林號寃皆曰上壽宜公也止於六十七而已若天缺之而不知永譽於其終天正所以全之也皆曰備福宜公也壽未盡以享之若天嗇之而不知瓜瓞於其後天正所以綿之也人之於公也若怨天吾不敢怨天亦不言於乎哀哉宣厚官茲土靈輒遶旋故鄉山水薄陳豆蓬尚享

謁二程廟奠文

陳宣

於乎聖人既沒伊誰復明群儒既作伊誰折衷此

伊洛之流所以道百川而東之嵩陽之祠所以績千載於無窮者也 宣晚生小子景仰休風歷觀諸子之異獨歸聖賢之同二簋以時于天地中尚享

謁康節墓奠文

惟公之學原天地之始要天地之終出入造化牢絡鴻濛事一過四於邑冲冲抗一世而孤立振萬古而長雄安樂一窩無名一公皇極經世誰其不宗宣辱守茲土一奠匪恭尚享

謁伊尹故址奠文

惟公抱元聖之資付興商之託任以天下道以先

覺匹夫匹婦無憾溝壑直忝司民牧豈勝愧作尋公故址神眇寥廓盥而不薦有孚顒若尚享

更三賢祠奠文

伊尹二程合為祠於學旁

有濟世之大德有訓世之大功地亦相近道亦相同特去淫祠合祀一宮神其來格洋洋顒顒

諭祭封都指揮僉事李祥

曰惟爾遭逢全盛晦迹丘園蹈履善良著稱里閭篤生賢子為國近臣慶澤彌深褒寵累錫正宜祿養安享暮齡胡疾弗瘳溘焉長逝訃音來至良用悼嗟遣祭有儀特超常典爾靈不昧尚克歆

承

祭漢洛陽令強項侯董公宣文

陳宣三道

董公洛陽故有祠弘治己未夏六月知府陳宣因其廢墜督義民修之祭以文

烏虜事曠百世感寔何從剛直之氣天德之哀洛陽一令漢以侯封古今異世天下同風祀廟弗稱以義勸崇落以牲醴用啓神聰尚享

九賢祠成祭以文

烏虜萬古一理千聖一心瀛溪濬始伊洛源深獨樂抗世一窩豪吟仁推天地義正古今儒集大成麗澤書音世換祠亡杳不可尋修復廢墜則在我

任志設有文尚其來歆

伊洛淵源祠成祭以文

烏虜惟惜昔孔孟為天下師慕道雲合賓賓者隨迨二夫子尊聞行知則其模範率其繩規春風和氣秋陽載漪出入其門如卜耆龜我鄉十哲負笈問疑得道多助何日忘之宣忝守茲土實獲我私謹構數椽以為公祠敢遡淵源吾道頭丕配以謝呂諸子咸秩有辭尚享

真文正范公墓文

先天下之憂而憂後天下之樂而樂浩然剛大允  
矣槩獲富有宋而特起儒三代而唯諾出將入相  
宇宙開拓吾道生氣奸瞻摧落宣來守是邦日尋  
伊洛功宗賢祠心猶文莫萬安山下崇土堂若仰  
止何言薄共一酌尚享

維弘治十二年歲次己未五月庚申朔越十  
二日辛未

皇帝遣太子少保禮部尚書徐瓊

諭祭于少傅兼太子太傅戶部尚書

謹身殿大學士劉健繼室一品夫人陳氏曰爾以  
衣冠著姓懿行夙成配德名儒從官翰苑持身正  
內教子登科蚤被恩褒久沾祿食夫階荐陟寵命  
屢加秩冠品流先生族里儉動益著敬慎無違視  
履考祥宜臻壽祉胡然一疾遽告長終眷我元臣  
特頒卹典賻儀筮制夏出常倫仍遣禮卿俯臨



諭祭爾靈不泯尚克敬承

弘治十三年歲次己未十二月丙戌朔越十

五日庚子

皇帝遣河南等處承宣布政使司左布政使仰景

諭祭于少傅兼太子太傅戶部尚書

謹身殿大學士劉健繼室一品夫人陳氏曰爾以

元臣嘉配著美名門疊受褒封旋躋極品賢淑之

行莊肅之規凡厥有家悉遵矩範壽雖弗永式克

令終生榮死哀今昔罕比爰頒卹典用示優恩載

給舟車俾還鄉邑良辰告卜窀穸屆期復命有司

遠申

諭祭九原如在永賁幽光

祭名宦文

沈文華 知府

淮神河嶽精英今古代出道德文章勳業政事垂

炳汗青百世山斗斗等職守郡麾景仰尤切茲惟

仲秋禮宜將事謹潔牲牢式伸常祭尚享

祭鄉賢文

沈文華

惟神嵩洛儲英古今代出道德文章勳業政事垂

炳汗青萬世山斗斗等職守郡麾景仰尤切茲惟

仲秋禮宜將事謹潔牲牢式伸常祭尚享

祭二程文

沈文華

惟神高洛間氣聖賢絕學終古長明功推伊洛  
等職守郡麾景仰尤切茲惟仲秋禮宜將事謹潔  
牲牢式伸常祭尚享

祭九賢文

沈文華

惟神天地之英聖賢之學折衷之功垂訓之澤日  
月之明千古之烈△等職守郡麾景仰尤切茲惟  
仲秋禮宜將事謹潔牲牢式伸常祭尚享

禱雨文

沈文華

敢昭告于

本府城隍之神茲者驕陽肆害麥苗欲搗軍民歎  
望不能自安蓋由二三守臣祀典未脩誠意多舛  
舉措失宜刑罰不中糧差未均民隱未達豪橫肆  
毒而未鋤盜賊縱橫而未革致災之由匪詞可盡  
况今軍民困苦流離荼毒已極罪實在予於人何  
咎謹於本月二十一日二十二日躬率附廓大小  
衙門官吏師生里老人等各齋戒沐浴恭詣前壇  
前朝夕行香特誠祈禱仰荷 神慈弗加譴罰上  
體

朝廷愛養元元之意下憫軍民久困旱暵之苦請命

於

天大施甘澤田疇獲有秋之望遠近解塗炭之憂茲  
以良吉用潔牲牢載昭 神鑒永奠邦輿尚享

謝雨文

沈文華

敢昭告于

風雲雷雨之神

中嶽嵩山之神

河洛伊湮澗之神

郡社之神

郡稷之神茲以自冬徂春至雨愆期土脈燥竭麥

苗欲稿軍民違違不能自安謹於本月初六日以  
來躬率附廓大小衙門官吏師生里老人等各齋  
戒沐浴共加脩省敬詣壇前朝夕行香特誠祈禱  
本月初九日已具丹衷上干威聽仰荷 神慈憫  
旱恤災不加譴罰請命於

天憐施甘澤麥苗就潤遠近均沾茲惟良吉謹潔牲  
宰大昭 神貺惟 神鑒饗永庇邦輿尚享

脩府堂伐木告文

沈文華

木工之神曰河南為中州之大郡府治寔千里之  
具瞻堂陛必須崇嚴庶級豈宜頽圯歲月侵尋風

兩摧剝匪惟不稱吏民之觀抑恐或致岩墻之覆  
僉謀叶吉聚材鳩工眷茲良辰木工伊始用潔牲  
牢時伸告祭惟神鑒享式相厥成尚享

河南郡志卷之三十一

河南郡志卷之三十二

東嘉陳宣監修

洛陽喬縉編集

古滕崔譽

東鄆厲仲彰同校

史載擊壤之謠書記明良之歌三百篇之詩  
權輿漢唐

國朝祖二帝述三王風化天下聲律之多無以  
異乎前古故志詩類

賦

東都賦

漢班固

東都主人喟然而歎曰痛乎風俗之移人也子實  
秦人矜夸館室保界河山信識昭襄而知始皇矣  
烏覩大漢之云為乎夫大漢之開元也奮布衣以  
登皇位由數耆而創萬代蓋六籍所不能談前聖  
靡得而言焉當此之時功有橫而當天討有逆而  
順民故婁敬度入勢而獻其說蕭公權宜而拓其  
制時豈泰而安之哉計不得以已也吾子曾不是  
睹顧曜後嗣之末造不亦暗乎今將語子以建武  
之治永平之事監于太清以變子之感志往者王

莽作逆漢祚中缺天人致誅六合相滅于時之亂  
生民幾亡鬼神泯絕聖無完桓柩郭冢子罔遺室原  
野厭人之肉川谷流人之血秦項之災猶不克半  
書契以來未之或紀故下人號而上訴上帝懷而  
降監乃致命乎聖皇於是聖皇乃握乾符闡坤珍  
披皇圖稽帝文赫然發憤應若興雲霆擊昆陽憑  
怒雷震遂超大河跨北嶽立號高邑建都河洛紹  
百王之荒屯因造化之盪滌體元立制繼天而作  
系唐統接漢緒茂育群生恢復疆宇勲兼乎在昔  
事勤乎三五豈特方軌並跡紛綸后辟治近古之

所務蹈一聖之險易云爾且夫建武之元天地革  
命四海之內更造夫婦肇有父子君臣初建人倫  
寔始斯乃伏羲氏之所以基皇德也分州土立市  
朝作舟輿造噐械斯乃軒轅氏之所以開帝功也  
龔行天罰應天順人斯乃湯武之所以昭王業也  
遷都改邑有殷宗中興之則焉即土之中有周成  
隆平之制焉不階尺土一人之柄同符乎高祖克  
已復禮以奉終始允恭乎孝文憲章稽古封岱勒  
成儀炳乎世宗按六經而校德眇古昔而論功仁  
聖之事既該而帝王之道備矣至于永平之際重

熙而累洽盛三雍平之上儵脩衮龍之法服鋪平  
鴻藻信景鑠揚世廟正雅樂神人之和允洽群  
臣之序既肅乃動天輅導靈衢省方巡狩窮覽萬  
國之有無考聲教之所被散皇明以燭幽然後增  
周舊脩洛邑扇魏魏顯翼翼光漢京于諸夏總八  
方而為之極是以皇城之內宮室光明闕庭神麗  
奢不可踰儉不能侈外則曰原野以作苑順流泉  
而為沼發蘋藻以潛魚豐田草以毓獸制同乎梁  
鄒誼合乎靈囿若乃順時以蒐狩簡車徒以  
講武則必臨之以王制考之以風雅歷騶虞覽四

賦姪嘉車攻采吉日禮官敎正儀乘輿乃出於是發

鯨魚鏗坑華鐘登玉輅乘時龍鳳蓋琴林麗離和

鑿玲瓏天官景後寢威盛空山靈護野屬御方神

雨師泛灑風伯清塵千乘雷田起萬騎紛紜元戎竟

野艾鉞蟬琴桑雲羽旄掃雷兕旌旗拂天炊炊念炎

炎揚光飛文吐爛生風欲然野歆瞻山日月為之

奪明丘陵為之搖震遂集乎中圃陳師案屯駢部

曲列校隊勒三軍誓將帥然後舉烽伐鼓申令三

驅輕車霆激驍騎電驚由其發射范氏施御弦不

睥弟禽轡不詭遇飛者不及翔走者不及去指顧

倏忽獲車已實辨不極盤殺不盡物馬跡苑餘足

士怒未深薛先驅復路屬車按節於是薦三犧效

五牲禮神祗懷百靈覲明堂臨辟雍揚緝熙宣皇

風登靈臺考休徵俯仰乎乾坤參象乎聖躬目中

夏而布德敷四裔而抗稜西盪河源東澹徒海濟

純北動幽崖且南曜朱垠銀殊方別區界絕而不

鄰自孝武之所不征孝宣之所未臣莫不陸讐肆

水慄奔走而來賓遂綏哀牢開永昌春王三朝會

同漢京是日也天子受四海之圖籍膺萬國之貢

珍內撫諸夏外綏百蠻爾乃盛禮興樂供帳置乎

...

雲龍之庭陳百寮而贊群后寃呈儀而展帝容於  
是庭實千品旨酒萬鍾列金罍班玉觴嘉珍御太  
牢饗爾乃食舉雍撤大師奏樂陳金石布絲竹鍾  
鼓鏗耕苦鉤萌管絃擘于熅有抗五聲極六律歌九  
功舞八佾韶武備泰古畢四夷間奏德廣所及傑  
侏賈雙街離罔不具集萬樂備百禮暨皇歡浹群  
臣醉降烟日煜於調元氣然後撞鍾告罷百寮遂  
退於是聖上觀萬方之歡娛又沐浴於膏澤懼其  
侈心之將萌而怠於惠作乃申舊章下明詔命有  
司班憲度昭節儉示大素去後宮之麗飾損乘輿

之服御抑工商之淫業興農桑之盛務遂令海內  
棄末而反本背偽而歸真女脩織紵任男務耕耘  
器用陶匏服尚素玄恥織美而不服賤奇麗而不  
珍捐金於山沈珠於淵於口足百姓滌瑕盪穢而鏡  
至清形神寂寞耳目不營日欸之源滅廉恥之  
心生莫不優游而自得玉潤而金聲是以四海之  
內學校如林庠序盈門獻山交錯俎豆莘莘說下  
舞上歌蹈德詠仁登降飫白之禮既畢日相與嗟  
難玄德謹言弘說咸含和而吐氣頌曰盛哉乎斯  
世今論者但知誦虞夏之書詠殷周之詩講義文



之易論孔氏之春秋罕能精古今之清濁究漢德之所由唯予頗識舊典又徒馳騁乎未流温故知新已難而知德者鮮矣且入僻界西戎險阻四塞脩其防禦孰與處乎土中平夷洞達萬方輻湊秦嶺九峻工則涇渭之川曷若四瀆五嶽帶河汧洛圖書之淵建童甘泉館御列山孰與靈臺明堂統和天人太液昆明鳥獸之園日若辟雍海流道德之富游俠踰侈犯義侵禮孰與同履法度翼翼濟濟之徒習秦阿房之造天而不知京洛之有制識函谷之可閑而不知王者之無外主人之辭未終而都賓矍然失色逡巡降階採然意下捧手欲辭主人曰復位今將授子五篇之詩賓既卒業乃稱曰美哉乎斯詩義正乎揚雍事實乎相如匪唯主人之好學蓋乃遭遇乎斯時小子狂簡不知所裁既聞正道請終身而誦之其辭曰

於烏昭明堂明堂孔陽聖皇宗祀穆穆煌煌上帝宴饗五位時序誰其配之世祖先武普天率土各以其職猗歟緝熙允懷多福

右明堂詩

乃流辟雍辟雍湯湯聖皇莅止造舟為梁備備

婆國老乃父乃兄抑抑皇儀孝友光明於烏赫太  
上示我漢行洪化唯神永觀厥成

右辟雍詩

乃經靈臺靈臺既崇帝勤時登爰考休徵三光宣  
精五行布序習習祥風祁祁甘雨百穀養養庶草  
蕃繁廡武屢惟豐年於皇樂胥

右靈臺詩

嶽脩貢兮川效珍吐金景兮歆燁浮雲寶鼎見兮  
色紛紜煥其炳兮被龍文登祖廟兮享聖神昭靈  
德兮彌億年

右寶鼎詩

啓靈篇兮披瑞圖獲白雉兮效素鳥嘉祥阜兮集  
皇都發皓羽兮奮翹英容潔朗兮於溥精彰皇德  
兮侔周成永延長兮膺天慶

右白雉詩

東京賦

漢張平子

安處先生於是，以不能言者憮然有聞，乃莞爾而  
笑曰：若客所謂，小學膚受，貴耳而賤目者也。苟有  
胷而無心，不能知，即之以其宜，其陋分而禁古矣。由  
余以西戎孤臣，心慄，喏穆公於宮室，如之何其以

温故知新研覈言正非近於此感周姬之末不能取  
 政政用多僻始以公宮隣率於金虎羸氏搏翼擇肉  
 西邑是時也七以並爭競相高以奢麗楚築章華  
 於前趙建崇臺以後秦政利甯長距終得擅場思  
 專其侈以莫已也乃構阿房起甘泉結雲閣冠南  
 山征稅盡人戶以然後收以太半之賦威以慘夷  
 之刑其遇民也北口羅氏之芟草既蘊崇之又行火  
 焉慄慄黔首豈以高天躋籍厚地而已哉乃救  
 死於其頸以敵以役唯力是視百姓不能忍是用  
 息肩於大漢而以戴高祖高祖膺籙受圖順天行

誅杖朱旗而建大號所推必亡所存必固掃項軍  
 於垓下繼子嬰於軹塗因秦宮室據其府庫作洛  
 之制我則未暇是以西匠營宮目翫阿房規摹踰  
 溢不度入不減損之又損然尚過於周堂觀者狹  
 而謂之陋帝已譏其泰而弗康且高既受命運家  
 造我區夏矣文又躬自菲薄治致升平七德武有  
 大啓土宇封禪肅然之功宣重威以撫和戎狄呼  
 韓來享咸用紀宗存主饗祀不輟銘勲彝器歷世  
 彌光今捨純懿而論爽德以春秋所諱而為美談  
 宜無嫌於往初故蔽善而揚惡祗吾子之不知言

也必以肆奢為賢則是黃帝合宮有虞總章固不  
如夏季之瑤臺殷辛之瓊室也湯武誰革而用師  
哉盍亦覽東京之事以自寤且夫天子有道守在  
海外守位以仁不恃隘害苟民志之不諒何云巖  
險與襟帶秦負阻於二閔卒開項而受沛彼偏據  
而規小豈如宅中而圖大昔先王之經邑也掩觀  
九隩靡地不營土圭測景不縮不盈總風雨之所  
交然後以建王城審曲面勢洊洛背河左伊右瀍  
西阻九阿東門于旋盟津達其後大谷通其前迴  
行道乎伊闕邪徑徒乎鞞鞞太室作鎮揭以熊耳

底柱輟流鐔以大岷温液湯泉黑丹石緇王鮪岫

居能奴來驚三趾處妃攸館神用挺紀龍圖授羲

龜書界奴召伯相宅卜惟洛食周公初基其繩則

直蕞弘魏舒是廓是極經途九軌城隅九雉度徒

天堂以進度室以几京邑翼翼四方所視漢初弗

之宅也故宗緒中圮巨猾間疊竊弄神器歷載三

六偷安天位于時蒸民罔敢或貳其取威也重矣

我世祖忿之乃龍飛白水鳳翔參墟授鉞四七共

工是除橈槍星名旬始群幽靡餘區宇又寧思和

求中睿哲玄覽都茲洛宮曰止曰時昭明有融既

光厥武仁洽道豐登岱勒封與黃比崇逮至顯宗  
 六合殷昌乃新崇德遂作德陽塔南端之特闢立  
 應門之將將昭仁惠於崇賢抗義聲於金商飛雲  
 龍於春路屯神虎於秋方建象魏之兩觀旌六典  
 之舊章其內則含德章臺天祿宣明溫飭迎春壽  
 安永寧飛閣神行莫我能形濯龍芳林九谷八溪  
 芙蓉覆水秋蘭被涯渚戲躍魚淵游龜螭永安離  
 宮脩竹冬青陰池幽流玄泉冽清鴨鵝秋棲鶻  
 鷗春鳴睢鳩麗黃閣闕嚶嚶於南則前殿靈臺龕  
 驩安福謏門水室也曲榭邪阻城洳奇樹珍果鉤盾

所職西登少華亭候脩勅九龍之內寔曰嘉德西  
 南其戶匪雕匪刻我后好約乃宴斯息於東則洪  
 池清蘩綠水澹澹內阜川禽外豐葭茨獻蟹蜃與  
 龜魚供蝸蠹蒲佳與菱芡其西則有平樂都場示  
 遠之觀龍雀蟠蜿天馬半漢瑰異譎詭粲爛炳煥  
 奢未及侈儉而不陋規遵王度動中得趣於是觀  
 禮禮舉行義義具經始勿亟成之不日猶謂為之  
 者勞居之者逸慕唐虞之茅茨思夏后之卑室乃  
 營三宮布政頒常複廟重屋八選九房規天矩地  
 授時順鄉造舟清池惟水泱泱左制辟雍右立靈

臺因進距哀表賢簡能馮皮水夷觀授析視音穰  
災於是孟春元日群后旁戾百僚師師于胥斯泊  
藩國奉聘要荒來質具惟帝臣獻琛執贄當覲於  
殿下者蓋數萬以上爾乃九賓重臚人列崇牙張  
鑪設郎將司階虎戟交鏃龍輅充庭雲旗拂霓  
夏正三朝庭燎曾曾撞洪鍾伐靈鼓旁震八鄙軒  
磕隱訇若疾霆轉雷而激迅風也是時稱警蹕已  
下雕輦於東廂冠通天佩玉璽紆皇組要于將負  
斧宸次席紛純左右玉几穆穆而南面以聽矣然  
後百辟乃入儀辨等高卑以班璧羔皮帛之贄

既奠天子乃以三揖之禮禮之穆穆焉皇皇焉濟  
濟焉將將焉信天下之壯觀也乃羨公矣卿士登  
自東除訪萬機詢朝政勤恤民隱而除其肯人或  
不得其所若已納之於隍荷天下之重任匪怠皇  
以寧靜發京倉散禁財賚皇僚逮輿臺命膳夫以  
大饗饗餼浹乎家陪春醴惟醇燔炙芬芬君臣歡  
康具醉薰薰千品萬官已事而竣亦作竣退也勤屢省  
懋乾乾清風協於玄德淳化通於自然憲先灵以  
齊軌必三思以顧愆招有道於天陋開敢諫之直  
言聘立園之耿絜旅束帛之受受上下通情式宴

且盤及將祀天郊報地功祈福乎上玄思所以為  
虔肅肅之儀盡穆穆之禮殫然後以獻精誠奉裡  
祀曰允矣天子者也乃整法服正冕帶珩紘丁敢  
紘紘玉笄綦會火龍黼黻藻綵鞶厲結飛雲之袷  
輅對翠羽之高蓋建辰旒之太常紛焱悠以容裔  
六玄蚪之奕奕齊騰驤而沛艾龍輶華轡金鈹鏐  
錫方鉞左纛鉤膺玉璫蓋聲噦噦和鈴缺缺重輪  
貳韉䟽轂飛軫羽蓋葳蕤葩瑤瓜曲莖順時服而  
設副咸龍旂而繁纓立戈迪屨農輿輅木爲車九  
九乘軒並轂車伏弩重旃朱旌青屋奉引既畢先

輅乃發駕旗皮軒通帛綃旒雲罕九旒闌戟轆轤

髻髦被繡虎夫戴鷩駘附承華之蒲梢飛流蘇之

騷殺總輕武於後陳奏嚴古之嘈噉才達戎士介

而揚揮戴金鉦而建黃鉞清道案列天行星陳肅

肅習習隱隱麟麟丁見未出乎城闕旆以迴乎

郊畛盛夏后之致美爰恭敬於明神尔乃孤竹之

管雲和之瑟雷鼓譟譟六變既畢冠華秉翟列舞

八佾元祀惟祗群望咸秩颺煥燎之炎煬樣致高

煙乎太一神歆馨而顧德祚灵主以元吉然後宗

上帝於明堂推光武以作配辨方位而正則五精

帥而來推尊赤氏之朱元四灵茂而允懷於是春  
秋改節四時迭代蒸蒸之心感物增思躬追養於  
廟桃奉蒸嘗與禴祠物性辨徧省設其福衡毛魚  
豚胎博亦有和羹滌濯辭嘉禮儀孔明万舞奕奕  
鐘鼓皇皇靈祖皇考來頌來享神其醉止降福穰  
穰及至農祥農止土膏脉起乘銜輅而駕蒼龍介  
保介馭間以剡耜躬三推於天田脩帝籍之千畝  
供禘郊之采盛必致思乎勤已兆人勸於疆場咸  
懋力以耘籽春日載陽合射辟雍設業設謨懋金  
鏞蕤鼓路設柷羽幢幢於是備物物有其容伯夷

起而相儀后夔坐而為工張大佻制五正設三乏  
篚青司旌并夾既設儲乎廣庭於是皇輿風駕進  
於東階以須消啓明掃胡霞登天光於扶桑天子  
乃撫五輅時乘六龍發鯨魚鏗華鍾大丙珥鄭風  
后陪乘珥提運衡徐至於射宮禮事戾樂物具王  
夏闕騶虞奏决拾既次廊弓斯設達餘萌於暮春  
昭誠心以遠喻進明德而崇業滌養養之貪欲仁  
風衍而外流詛方激而返薦日月會於龍甃閭恤  
人事之勞疾因体力以息勤致歡忻於春酒執寫  
刀以袒割奉觴豆於國叟降至尊以訓恭送迎拜



乎三壽敬慎威儀示民不偷我有嘉賓其樂愉愉  
声教布濩盈益天區文德既昭武節是宣三農之  
隙曜威中原歲惟仲冬大閱西園虞人掌焉先期  
戒事悉率百禽鳩諸灵囿歆之所同是諸告備乃  
御小戎撫輕軒中畋四牡既信且閑戈矛若林牙  
旗繽紛迄于上林結徒為管次扣樹表司鐸授鉦  
坐作進退節以軍声三令五申示戮斬牲陳師鞠  
旅教達禁成文烈具舉武士星敷鵠鶴魚麗箕張  
翼舒軌塵掩近匪疾匪徐馭不詭遇射不剪毛升  
獻六禽時膳四膏馬足未極輿徒不勞成禮三獸

解罟放麟不窮樂以訓儉不殫物以昭仁慕天乙  
之弛罟因教祝以懷民伋姬伯之渭陽失熊羆而  
獲人澤浸昆虫威振八寓好樂无荒乞文乞武薄  
狩于敖既瑣瑣焉岐陽之蒐又何足數尔乃卒歲  
大儺驅除群厲方相秉鉞巫覡操薊侖子万童丹  
首玄製桃孤棘矢所發死臬刈飛礫雨散剛瘳必  
斃煌火馳而星流逐赤疫於四裔然後凌天池絕  
飛梁捎螭魅測角斲猶莖筆狂惡疾斬蛟蛇腦方  
良囚耕父於清泠溺女魑於神潢殘雙魑與罔象  
殪野仲而殲游光八灵為之震懼况魑蠹與畢方

度朔作梗守以鬱壘神荼副焉對操索常目察區  
取司執遺鬼京室密清罔有不趨於是陰陽交和  
庶物特育卜禎考祥終焉充淑乘輿巡乎岱岳勸  
稼穡於原陸同衡律於一軌量濟急於寒燠首  
幽明以黜陟乃反旆而迴復望先帝之舊墟慨長  
思而懷古俟閭風而西遐致恭祀於高祖既春游  
以發生啓諸蟄於潛戶度秋豫以收成觀豐年之  
多稼嘉田畷之匪懈勤致賚於九苞左瞰陽谷右  
睨玄圃眇天末以遠期規萬世而大摹且歸來以  
釋勞膺多福以安念羊王心集瑞命備致嘉祥圍

林氏之騶虞擾澤馬與騰黃鳴女牀之鳶鳥舞丹  
穴之鳳皇植華平於春圃豈朱草於中唐惠風廣  
被濯洎幽荒北蠻丁令南韶越裳西包大秦東過  
樂浪重舌之人九譯貪糴自而來王是故論其疆  
易京則同規乎殷盤改奢即儉則合美乎斯干登  
封降禪則齊德乎黃軒為無為事無事永有民以  
孔安遵節儉尚素樸思仲尼之克己履老氏之常  
足將使心不亂其所在目不見其所欲賤犀象簡  
珠玉藏金於山抵璧於谷翡翠不裂璆瑁不簇所  
責惟賢所寶惟穀民去末而反本咸懷忠而抱慤

于斯之時海內同悅曰吁歎帝之德馨俟其備而  
蓋莫英為難得也故曠世而不覲惟我后能殖之  
以至和平方將教諸朝階然則道胡不懷化胡不  
柔声與風翔澤徒雲遊萬物我賴亦又何求德寓  
天覆輝烈光燭狹三王之赳赳軼五帝之長驅踵  
二皇之遐武誰謂駕遲而不能屬東京之懿未瑩  
值余有犬馬之疾不能究其精詳故粗為賓言其  
梗槩如此若乃流遁志反放心不覺樂而無節後  
罹其戚一言幾於喪國我之未學也且夫挈瓶之  
智守不假器况纂帝業而輕天位瞻仰二祖殿庸  
孔肆常翹翹以危懼若乘奔而無轡白龍魚服見  
困豫且雖萬乘之無懼猶怵惕於一夫終日不離  
於輜重獨微行其焉如夫君人者鞋屨塞耳車中  
不內顧珮以制容蓋以節塗行不變玉駕不亂步  
却走馬以糞車何惜騶囊與飛兔方其用財取物  
常畏生類之殄也賦政任役常畏人力之盡也取  
之以道用之以時山無槎枿政不虞鵠胎草木繁  
無鳥獸阜滋民忘其勞樂輸其財百姓同於饒衍  
上下共其雍熙洪恩素蓄民心固結執義顧主夫  
懷貞鄙怨姦慝之干命怨皇統之見替玄謀設而

陰行合二九而成譎登聖皇於天階章漢祚之有  
秩結若此故王業可樂焉今公子苟好勦民以媮  
樂忘民怨之為仇也好殫物以窮寵忽下叛而生  
憂也夫水所以載舟亦所以覆舟堅冰作履霜尋  
木起於葉栽昧旦不显後世猶怠况初制於甚秦  
服者焉能改裁故相如壯上林之觀揚雄騁羽獵  
之辭雖係以頽墻填壘亂以叔直解采卒無補於  
風規猶以昭其愆尤臣濟甯以陵君忘經國之長  
基故函谷擊折於東西朝廷顛覆而莫持凡人心  
是所學体安所習鮑肆不知其臭說其所以先入

咸池不齊度於繩交而衆聽者或疑能不惑者其  
惟子野乎客既醉於大道飽於文義勸德畏戒喜  
惧交爭罔然若醒朝疲夕倦奪氣禿魄之為者也  
忘其所以為談失其所以為夸良久乃言曰鄙哉  
予乎予習非而遂迷也幸見指南於吾子若僕所  
聞華而不實先生之言信而有徵鄙夫寡識而今  
而後乃知大漢之德馨咸在於此昔常恨三墳五  
典既泯仰不覩炎帝帝魁之美得聞先生之餘論  
則大庭氏何以尚茲走雖不敏庶斯達矣

洛神賦

魏曹子建

黃初三年余朝京師還濟洛川古人有言斯水之

神名曰宓如感宋玉對楚王說神女之事遂作斯

賦其詞曰余從京師言歸東藩昔伊闕越轅還轅

素經通谷陵景山日既西傾車殆馬煩尔迺稅駕

乎蘅胡阜秣駒乎芝田容与乎楊林流眄乎洛川

於是精移神駭忽焉思散俯則未察仰以殊觀觀

一麗人于巖之畔尔迺援御者而告之曰尔有覲

於彼者乎彼何人斯若此之豔也御者對曰臣聞

河洛之神名曰宓妃則君王所見也無迺是乎其

狀若何臣願聞之余告之曰其形也翩若驚鴻婉

若游龍榮耀秋菊華茂春松髣髴兮若輕雲之蔽

月飄颻兮若流風之迴雪遠而望之皎若太陽升

朝霞迫而察之灼若芙蕖出綠波穠纖得中脩短

合度肩若削成腰如約素延頸秀項皓質呈露芳

澤無加鈿華不御雲鬢峨峨脩眉連娟丹唇外朗

皓齒內鮮明眸善睐類靨輔承權瓊姿豔逸儀

靜休閑柔情綽態媚於語言奇服曠世骨像應圖

披羅衣之璀璨兮珥二音瑤碧之華瑤居戴金翠之

首飾綴明珠以耀軀踐遠遊之文履曳霧縠之輕

裾微幽蘭之芳馥兮步趨於山隅於是忽焉縱

體以邀以嬉左倚采旄右蔭桂旗攘皓腕於神游  
荒兮采湍瀨之玄芝余情悅其淑美兮心振蕩而  
不怡無良媒以接歡兮託微波而通辭願誠素之  
先達解玉珮而要干之嗟佳人之信脩嗟習禮而  
明詩抗瓊瑤離以和予兮指潛川而為期執眷眷  
之款實兮懼斯靈之我欺感交甫之弃言兮悵猶  
豫而狐疑叔和顏而靜志兮申禮防以自持於是  
浴靈感焉徒倚徬徨神光離合乍陰乍陽竦輕軀  
以鶴立若將飛而未翔跋椒塗之郁烈步蘅衡薄  
而流芳超長吟以求慕兮聲哀厲而彌長爾迺眾  
靈雜還命傳嘯仁或戲清流或翔神渚或采明珠  
或拾翠羽從南湘之二妃携漢濱之游女歎匏瓜  
之無匹詠牽牛之獨處揚輕袿圭之綺靡翳脩袖  
以延佇體迅飛鳧飄忽若神凌波微步羅襪武月生  
塵動無常則若危若安進止難期若往若還轉眄  
流精光潤玉顏含辭未吐氣若幽蘭華容婀娜  
可奴令我忘餐於是屏併翳收風川石靜波馮夷鳴  
鼓女媧清歌騰文魚以警乘鳴玉鸞以偕逝六龍  
儼其齊首戴雲車之容裔鯨鯢踊而夾轂水禽翔  
而為衛於是越北止過南岡紆素領迴清陽動

朱脣以徐言陳交接之大綱恨入神之道殊怨盛  
年之莫當抗羅袂以掩涕兮淚流襟之浪浪卽悼  
良會之永絕兮哀一逝而異鄉無微情以效愛兮  
獻江南之明璫雖潛處於太陰長寄心於君王忽  
不悟其所含悵神霄而蔽光於是背下陵高足往  
心遺情想像顧望懷愁冀靈體之復形御輕舟  
而上泝浮長川而忘反思絲絲而增慕夜耿耿而  
不寐霑繁霜而至曙命僕夫而就駕吾將歸乎東  
路攬駢轡以抗策悵盤桓而不能去

閑居賦

潘岳游寓洛陽作

晉潘岳

遨墳素之長圃步先哲之高衢雖吾顏之云厚猶  
內愧於審濂有道余不仕無道吾不愚何巧智之  
不足而拙艱之有餘也於是退而閑居于洛之澗  
身齊逸民名綴下士背京泝伊面郊後市浮梁黜  
以逐度靈臺傑而高峙窺天文之秘奧覩人事之  
終始其西則有元戎禁營玄幕綠微谿子巨黍異  
秦同鼎礮石雷駭激矢蟲飛以先啓行耀我皇威  
其東則有明堂辟雍清穆敬閑環林縈映圓海回  
泉聿追孝以嚴父宗文考以配天祇聖敬以明順  
養更老以崇年若乃背冬涉春陰謝陽施天子有

事于柴燎以郊祀而展義張鈞天之廣樂備千乘  
之萬騎服振振以齊玄管鞀鞀而並吹煌煌乎隱  
隱乎茲禮容之壯觀而王制之巨麗也兩學齊列  
雙宇如一右延國胄左納良選邠邠生徒濟濟儒  
術或升之堂或入之室教無常師而道在則是故  
髦士投紱名王懷璽訓若風行應猶草靡此里仁  
所以為美孟母所以三徙也爰定我居築室穿池  
長楊映沼芳楨樹籬遊鱗逸瀟涵菡敷披竹木翳  
藹靈果參差張公大谷之梨梁侯烏裨之柿周文  
弱枝之東房陵朱仲之李靡不畢植二桃表櫻胡  
之別三柰耀丹白之色石榴蒲萄之珍磊落蔓延  
乎其側梅杏郁棣之屬繁榮藻麗之飾華實照爛  
言所不能極也菜則葱蒜韭芋青荀紫薑華齊其  
旨蓼萋芬芳蕤荷依陰時藿向陽綠葵含露白薤  
負霜於是凜秋暑退熙春陽往微雨新晴六合清  
朗太夫人乃御板輿升軒遠覽王畿近周家園  
体以行和藥以勞宣常膳載加舊疴有痊於是席  
常筵列孫子柳垂陰車結軌陸摘紫房水挂頰鯉  
或宴于林或楔于汎昆弟班白兒童稚齒稱萬壽  
以獻觴咸一懼而一喜壽觴舉慈顏和浮盃樂飲



絲竹駢羅頓足起舞抗音高歌人生安樂孰知其  
他退求已而自省信用薄而累勞奉周任之格言  
敢陳力而就列幾陋身之不保而奚擬乎明哲仰  
衆妙而絕思終優游以養拙

函谷關賦

李尤

畧曰上羅三關下列九門南有蒼梧荔浦離水謝  
沐涯浦零中以窮海陸北有肅居天井壺口石陘  
貫越代朔以臨胡庭緣邊耶指陽會玉門西有隨  
隴武夷白水江靈沔漢阻曲路由山泉衆關莫盛  
於函谷銘曰函谷險要襟帶喉咽尹從李老留作

二篇孟嘗嘗秦諷以鷄鳴見王海引文選

五鳳樓賦

梁周翰

伊京師之雄輿也殿哉邈乎驗河圖之象按輿地  
之書宅禹貢豫州之域距天文辰馬之墟因四履  
建侯之地為六代興王之居城浹而都派河而渠  
結坤之絡振乾之樞星躔擲堵我民之廬海漕山  
膾我田之租勢雄跨胡氣王吞吳茫茫萬國魚貫  
而趨惟聖皇之受命慮期運而握符光潛躍於龍  
德踐元亨於帝衢道德何師尊廬赫胥揖讓何比  
喻唐有虞吳略神武威憚八區封豕必誅長鯨盡

剝虎皮包刃鵠板搜儒墜典皆索闕政咸鋪成天  
下之大務若雷奮而風驅乃顧京室時行聖謨陋  
宸極之非制稽紫垣之舊圖且曰不壯不麗豈傳  
方世禹之卑宮蓋勿暇之計克之茅茨非經久之  
制矧象魏之縣法伊億兆之所視况我力如天我  
貨如地不漁爾民不牟爾利一毫之費差足為易  
乃詔共工度景之中因舊謀新庀徒僦功臺卑者  
豐棟易而降楹斷而礮去地百丈在天半空五鳳  
翹翼若鵬運風雙龍蟠首若鼉載宮丹楹霞繞神  
光何融朱檻虹植晴文始烘繡楹焜燿彫拱玲瓏

椒壁塗赭綺窻暈紅雙闕偶立突然如峯平見千  
里深映九重奔星墜一而交觸靈星互而相逢門呀  
洞缺若天之設縱舉百武橫駕六轍金鋪燦人光  
景明滅舞陽之力莫得而排叔梁之力胡可以扶  
其下則冠蓋葳蕤劍佩陸離車如流水待漏而馳  
駕肩排踵兼蜜渾夷万衆紛錯魚龍尊卑咸去來  
之由此競奔臻於玉墀亶皇風之無外豈朝盈之  
有時三事庶尹乃拜表蕭牆謁帝未央以落大壯  
登歌求昌曰元聖明兮帝道昌威四海兮君萬方  
時高闕兮冠百常赫赫宋德芒垂無彊瞻天頽兮

獻壽觴願君王乃長樂康帝曰俞哉爾屬且置當  
聽朕言庶曉朕意頃於戎馬之暇詳窺歷代之記  
乃知乎夏德之衰璇室且庇商政之壞瓊宮大侈  
楚王章華一身何寄秦皇阿房三世而棄漢武栢  
梁孽火隨熾陳后王閔義師尋至豈非乎禍生於  
漸欲起於恣亦如崇飲不已必至昏醉嗜色不已  
必至乏瘁遷怒不已必絕人祀窮兵不已必暴人  
胔耳諛不已必料忠義溺諛不已必非賢智亡國  
之君未嘗不尔朕皆知之得以趨避淫於土木誰  
不如是美其成功良以為愧不舉君觴恐驕朕志  
其大者天地所重者神器尾虎足永終日惴惴當  
共重之勿使顛墜謹謝公卿無忘納誨群臣以退  
咸呼萬歲

登北邱賦

晉張協

陟巒立之灑施升遠迤之脩坂回余車於峻嶺  
聊送目於四遠伊洛混而東流帝居赫以崇顯於  
是徘徊絕嶺踟步趾前瞻狼山却闌大岷東眺  
虎牢西睨熊耳邪亘天際旁極萬里莽眩取以茫  
昧諒群形之維紀爾乃地勢宏隆丘墟陂池墳壠  
環疊蒸布星羅松林慘映以攢列玄木搜寥而振

柯壯漢氏之所建望五陵之鬼哉

懷忠賦

唐歐陽詹

丙寅歲四月受讎季冬之月丁殷延閣龍逢墓焉昔聆其風未嘗不迴腸流涕觀大壙

天生彼辛芳用殲覆于夏家歆悠悠而罔極毒浩  
浩而無涯無古辛以殞身肆市朝之若擗奔有道  
而併命委炮烙以如麻伊先生之諤諤為酷烈之  
所加嘗披面於往載每廢恭以與嗟瀟條舊邑森  
蒼空陂陷陵成坎古木無枝或曰此其墓也又益  
倍以增悲嗚呼麟非吞噬之儔詎虎狼之共穴鳳

實仁靈之類豈鷹鷂之同列惟玉石之分明亦薰  
猶之自別是以審審心競昂昂面折彼炎炎之燎  
原信撲撲而不滅寧歸死以申懷不貪生而結舌  
痛矣哉古人有言輔仁者天福善者神胡為是日  
功匪加入使典章之不信俾忠義之難勤律中大  
呂日臨蒙谷風颼颼於衰草烟茫茫乎平陸思淒  
淒而填臆淚淫淫以盈目義則非於知交親故遠  
夫骨肉節臨危而不撓行於難而弥篤惟其有之  
是以傷之而慟哭

洛陽懷古賦

宋邵雍

洛陽之為都地居天地之中有終天之王氣在焉  
予家此治平歲會秋乘雨霽與殿院劉君玉登天  
宮寺三寶閣洛之風景因得周攬惜其百代興廢  
以來天子雖都之而多不得其久居也故有懷古  
之感以通諷誦諭君玉好賦以賦言秋雨霽日色  
清景方出秋益明何幽懷之能快惟高閣之可憑  
天之空廓風之輕冷覽三川之形勝感千古之廢  
興乃眷西北物華之妍雲情物態一氣茫然擁樓  
闕以高下煥金碧之光鮮當地勢之拱處有王居  
之在焉惜乎天子居東都此邦若諸夏不會要於

方來不號令于天下声名文物不此而出道德仁  
義不此而化宮殿森列鞠而為茂草園囿綦布荒  
而為平野壑嶼曾不到者三十餘年使人依然而  
歎曰虛有都之名也噫夏王之治水也四海之內  
列壤惟九而居中者實曰豫州荊州之北此為上  
流周公之卜宅也率土之濱建國為萬而居中者  
實曰洛陽潒澗之側此惟舊邦迄于今日二千年  
之有餘因興替之不定故靡常其厥居我所以作  
賦者閔古今變易之時述興亡異同之迹追既失  
之君王存後來之國家也噫太昊始法二帝成之

三王全法參用適宜伊六聖之經理實萬世之宗  
師我乃謂治民之道於是乎大盡矣建夫五霸抗  
執七雄駕威漢之興乘秦之弊晉之擅幸漢之衰  
始鼎立而治終豆分而隳晉中原之失守宋江左  
之畫畿或走齊而驛魏或道陳而經隋自元魏廓  
河南之士植六朝之風物李唐蟠閩中之蠖孕五  
代之亂雖其間或道盛而得民或兵強而懼下或  
虎噬而龍噬或雞狂而犬詐或創業於艱難或守  
成於逸暇或覆餗而終焉或苞桑而振者故得陳  
其六事雖善惡不同其成敗一也其一曰德之為

大也能潤天下必先行之於身然後化之於人化  
也者効之也自人而効我者也所以不嚴而治不  
為而成不言而信不令而行順天下之性命育天  
下之生靈其帝者之為乎其二曰至哉政之為大  
也能公天下必先行之於身然後教之於人教也  
者正之也自我而正之者也所以有嚴而治有為  
而成有言而信有令而行按天下之疾苦遂天下  
之生靈其王者之所為乎其三曰壯哉力之為大  
也能教天下必先豐府庫峙倉箱銳鋒鏑峻金湯  
嚴法令于烈火肅兵刑于秋霜竦民聽於上下懼

夷心于外荒其伯者之所為乎其四曰時若傷之於隨失之於寬始則廢事終則生姦既利不能勝言故况得以疾賢是必薄其賦歛故民不困而民愈困省其刑罰故民不殘而民愈殘蓋攻之道失其本矣其五曰時若任之以民專之以察始則烈烈終則缺缺既上下以交害乃息信之見奪是必峻其刑罰故民不犯而民愈犯厚其賦斂故國不竭而國愈竭蓋致之之道失其末矣其六曰水旱為沴年歲豐虛此天地之常理雖聖人不能無蓋有備而無患不得中者加以寬猛失政輕重逸權不有水旱而民已困而况有水患兵革焉所謂本末交失不止何待天下有成敗六焉此之謂也君天下者得不用聖帝之典謨行明王之教化士可殺不可辱民可近不可下上能撫如子焉下必戴其后也仲尼所以陳革命則擲為人之匪君明遜國則杜為人臣之亂倫刪詩以揚文武之美序脩春秋而罪諸侯之亂倫刪詩以揚文武之美序書以遵堯舜之仁贊大易以都括與六經而並存意者不可以地之重易民之教不可以民之教悖天之時必時教之各惜則居地而得宜是故知地

不可固有之也君上必欲為帝事則請執天道焉  
中為王事則請執人道焉下為伯事則請執地道  
焉三道之間能舉其一千古之上猶反掌焉則是  
洛之興也又何計乎都與不都也如欲用我吾從  
其

少室山三十六峯賦

宋樓昇登封令

余少聞洛邑之盛在唐宋為東西都而山川形勢之  
富視他州為傑觀昔韓退之白樂天見於歌詩形  
容勝槩有缺歎不足之意後歐陽文忠與梅謝諸  
賢相繼為僚友數遊嵩少間至今以為美談余幸  
以不敏得令嵩高縱觀諸境未有過於少室者而  
峽函聳拔乃在戶牖間朝夕博望歷歷可數因作  
三十六峯賦以自廣非敢竊比古詩之流云

伊浮雲之公子兮訪道於林丘而棲神於函谷超  
然有遊方之志兮乃東升於岱頂而西謁於華麓  
雖衡陽之南兮與夫恒山之北靡不窮探力踐兮  
游心而聘目獨怡然而忘歸兮內忻然而自足忽  
御風而行兮排空濛而造中域徐睥睨以四顧兮  
意恍惚而有失遭嵩高之丈人而問津兮曰游四  
方而真有得何高之不登兮何危之不陟今乃西



望兮岌然而聳特雄柱天綱兮橫亘於地軸連絡  
偃覆兮龍盤而虎伏雖華以九而巫以十二兮曾  
未覩奇峯之六六丈人放杖而笑兮秋水方至而  
河伯自溢子烏覩海若之難匹兮獨不聞中天之  
火室其高則峽岫嶠萃峯岑鬱嶺兮十有六里而  
疊有十八其深則環紆縈繞盤糾紛錯兮上方十  
里而周圍一百包嵩陽以作鎮兮截輾轅以為郭  
眷歌山之所聞兮觀舞水之所樂其上則有嘉禾  
甘果兮神芝與仙藥石柱若承露之盤兮帝休若  
揚枝之葉石脂所滴兮飲之可長上古玉膏在巔  
兮服之可以揖羽客雲母之井兮寶所聚光明之  
穴兮書所鑠一文之鍾乳兮可餐千歲資糧兮不  
絕其中可避兵水之災兮自有經書之博其神異  
則玉女爛織錦之文兮金人浴白露之落雲洞警  
時聞之鍾兮石井泣哀鳴之鶴兮王子晉環之以為  
壘兮阿育王寶之以為塔此皆公子之所未知兮  
而丈人之所安宅丈人曰名生一於實兮義設於適  
子知其一兮未知其二子識其外兮未識其內是  
徒知六六之所有兮而烏覩六六之名義東朝岳  
祠儼百神兮西望洛邑鬱千宮兮太陽必陽山之

明兮石城石笋天所形兮檀子日丹砂寶所鍾兮鉢  
 孟香爐狀所肖兮連天紫霄數力之穹兮羅漢七佛  
 像設留兮靈隱來仙洞府深兮清涼寶勝梵刹標  
 兮瑞應瑤壁祥光紛兮紫蓋翠華煙靄凝兮藥堂  
 紫薇花草靈兮白道天德名兮偉兮卓劔白雲形  
 實紀兮金牛明月色像起兮凝碧迎霞天先聚兮  
 玉華寶柱金石瑩兮繫馬白鹿神仙眾兮此則六  
 六之名義兮而未覩六六之京氣夫人曰方春陽  
 之盎盎兮煥痕蕪沒而青青紛紅紫之綉錯兮引  
 百轉之幽禽堆綠條觀兮切星辰而上侵玉仙神  
 女兮乘鞦韆而下臨朱明草木之林疎兮蔽天明  
 之午外山椒雲氣之冉冉兮若覆甍而鬱蒸忽雨  
 聲於天外兮勢翻盆而倒傾唯紫兮與黃鶴兮舞  
 長空而產英金鷗之驚葉兮山空落石若仙人之  
 鍛聲夜月白而風冷冷兮玉笙清微而珥聽暨玄  
 陰林柯之脫盡兮山形瘦而骨稜稜以冰雪橫積於  
 千仞兮玉龍飛而白虎亭亭惟四時之出沒變態  
 兮顯晦陰晴不可得而盡名豈特仰觀俯聽自辰  
 及酉應接之不暇兮以盡朝昏此雖丈人所不能  
 形容兮而豈公子之所可預聞丈人曰突兀撐空

兮千變萬狀山經地志兮不可究量或背若相戾  
兮或面若相向或踈若相闕兮或揖若相盼或散  
若相忘兮或聚若相訪或後者若和兮而前者若  
唱或卑者若下兮而尊者若上或喜兮若相携或  
怒兮若相抗或若秦晉兮相匹或若楚越兮相望  
或聳瘦兮若莪冠或臃腫兮若挾纊或蹲伏兮若  
駝虎或崇聚兮若甕盎或威嚴兮若壯士或勇猛  
兮若梟將或快驟兮若風馬或浮空兮若舡舫或  
若遊郊原兮壘立墳而包柩擲或若入宗廟兮紛  
豆登而鬱拒鬯載載兮森劔戟落落兮列屏幃勢  
領畧兮斷而還連狀容與兮窈而復壯超然若三  
十六天兮神仙人之洞宅婉然若三十六宮兮妃媼  
之遊燕昂霄葆整冠佩悠兮泉飛霞傾爵筆流兮  
天闕星熒玉杵成兮松臺瑟瑟鈞天迎兮嬌雲曲  
月鬢眉新兮煙斜霧蒸龍麝焚兮霞舒霓卷舞袖  
張兮雷霆轟轟宮車還兮言未既而公子頽然如  
醉兮洒然如醒非丈人無以藥之使瘳兮刮之使  
明僕未能窮茲山之勝踐兮究茲山之曜靈請執  
杖履兮以從從塵

嵩山賦有序

劉咸

五嶽惟嵩居天地之中而其峰巒之秀偉亦非他  
山可及故古今騷人墨客往往見之歌詠予不自  
揣亦掇拾其餘意而為之賦  
曰繫山阜之停峙  
均胚腴於玄黃諒疑形之有異故奠位而不常維  
嵩高之為嶽獨穹窿而直方雖同列於上下實尊  
處乎中央左襟帶于河洛右控制乎齊梁前屏列  
乎崆峒後幙障乎太行彼泰華衡恒之四鎮各東  
西南北於一方茲蓋造化者自然之工巧俾其乎  
天地同一又長夫豈若尋常之培塿而屑屑然乎  
群山較利於芒也哉觀其元氣淋漓靈根盤結磅

礴縈紆嶽巖嶽集質厚重而不遷勢蛇蟠而聯接

量含弘而有容神昭貺而莫測萬象效翁兮森羅  
四時光景兮明滅燁燁太士之瑞芝森森將軍之  
封栢猗猗九節之萑蒲燦燦三花之貝葉彼四萬  
八千丈之天台固僅能方其太室之三尖而根盤  
五百里之匡廬曾何足抵其少室之數疊若乃時  
和景霽天高氣清風生鶴唳日出鷄鳴霞彩凝兮  
錦綉錯嵐光蕩兮圖畫呈於斯時也凌絕頂履凌  
增恍兮惚兮蓋不知夫此身之在人世而別有所  
謂崑崙之輿蓬瀛也其或月暈星藏煙霏霧暗陽

烏匿形虹霓橫漢轟雷霆兮一聲分晴雨兮山半  
於斯時也挾天風遊汗漫窈兮闕兮亦不知夫此  
世之在人寰而又有所謂青城之與赤岸也雖然  
此特其朝暮陰霽之常態而未覩其倏忽變化之  
形容苟欲究其所以則雖智者莫得而窮彼其兩  
室諸峰層出疊起不參不差無徧無倚在少室者  
三十有六在大室者二十有四或萃律而崔嵬或  
秀偉而妍媚或迤邐而婆娑或隱約而虧蔽或羅  
列如兒孫或比肩如兄弟或尊嚴如父師或卑猥  
如媵婢或蕭散如神人或俊拔如豪士或如蛟走

而虬蟠或如牛眠而馬駛或如理木之連枝或如  
芙蓉之並蒂或如舟楫之浮空或如兵車之趨市  
或如忠臣之赤心或如豔姬之高髻矯矯兮如飛  
而翔飄飄兮如行而止于于兮如醉而醒怡怡兮  
如悲而喜凡茲山之青勝所可愛者如此然不指  
而稱焉則亦莫能然而識之矣故夫青童太白于  
晉浮丘玉人玉女會仙虎頭老翁遇聖兮相向黃  
蓋華蓋兮疊網鳳凰為陽獅子號狄玉桂壁立玉  
鏡光輝三鶴積翠兮排闥萬歲獨秀兮凝眸卧龍  
起雲兮淨如洗金堂玄龜兮翠欲流此則太室勝

槩之奇而天下之為峯者莫得而侔也若夫東朝  
歛祠西望洛邑白雲連天紫霄凝碧鉢盂丹砂之  
可觀香爐檀香之堪挹羅漢寶勝之可尋七佛靈  
隱之難覓大陽少陽之巍峩石城石笋之屹立紫  
微兮藥堂寶柱兮瓊壁來仙卓劍兮孤高翠華繁  
馬兮峻極紫蓋迎霞兮如丹玉華白道兮如璧明  
月清涼瑞應天德白鹿留形金牛見迹此則少室  
勝槩之奇而天下之為峰者又讎與之敵耶又如  
琳宮梵宇佛洞仙巖蝌蚪出而書見蕙苔發而霜  
寒龍潭隱靈物兮潛處天池通聖水兮潺湲歷代  
尊禪則有封祀之壇往來經行則有輟轍之闕凡  
若斯之歷歷皆可考而班班者也至若名傳於今  
事出於古測影定於周公化石由於啓母御筆書  
於則天金蠶築於漢武隱有棄瓢之許由庶有洗  
耳之巢父道有爽若之八仙佛有面壁之一祖出  
而重於世也又有索價之山人居而莫知其向也  
又有擣帛之仙女其他奇蹤粲然可數既不暇於  
細推亦無能為之悉舉也嗟夫拳石無情與時屯  
亨况非逢千載之景運抑安能得夫一時之謚寧  
惟

聖皇之在上屢賜寵而錫榮崇嘉號予以禮尊祀典  
予以誠故嵩之德以之而益者嵩之神由之而益  
靈自茲以往吾知太嶽之儲精必降申甫而駢生  
予以屏乎藩翰於以充乎

帝庭俾海宇之臣子咸永繁於昇平而吾又當秉霜  
臺之白筆以專紀夫三呼之頌聲也

嵩山二十四峯賦有序 曹連

按白虎通云嵩山者中央之岳獨加高字者以其  
居四方之中而又高且峻也故詩曰崧高維嶽峻  
極于天此之謂歟山有二十四峯曰青童黃蓋浮

丘三鶴遇聖萬歲玉鏡獅子瓦頭起雲鳳凰金臺  
華蓋玄龜卧龍會仙子晉玉柱老翁玉人玉女獨  
秀積翠太白皆遠近齊高無低昂之態有疑重之  
勢誠非天下山川比予因駐節騁目乃併志其名  
于左方以自適矣敢擬諸古賦云其辭曰

維登封之堙墟當旺暉之正中聳嵩高之斬絕屹  
千仞而穹窿託扶輿以正基應房宿以曜空結根  
彌於崑崙直指起乎崆峒霽輪困之繚繞迎曦馭  
之矐臙匪崖峩之莫測抑迢迢之難窮控齊梁之  
澗澗襟河洛之溶溶俯首陽之隱隱起太行之重

重田盤嶺嶺奔突巖崿峻極形於周雅配天始於  
唐封彼岱華霍恒之四嶽各分鎮於南北西東此  
則茲山之勝際閔古今而獨雄也其為寶藏也則  
金砂之璀璨璞玉之璘璫表中原之異產充上國  
之奇珍其為靈蹤也則石室棲其陽天池在其頂  
啟金刹於少林闕瑤宮於真境其為品彙也則凡  
根莖之屬飛走之群時涵時育以粹以滌超乎閭  
苑之蒨鬱甲乎靈囿之縱橫是雖博物之張華無  
以辨其類洽聞之郭璞曷能究其名也若夫豐隆  
停震飛廉捲霽嵐光浮漢林影篩日班二十四峯

之駢羅脫瑤簪於

鬢肖逆筍之噴吼侔列戟之

排立卓乎彩筆

而乍抽儼乎玄圭平水而初

錫聳乎蟠虬昂

而手驚鵬垂翼而奮擊

高低起伏遠近

巖巖三百里之磅礴陋武

夷五千丈之萃嶽彼

巫峯之十二匡廬之五老又

奚可比而儔擬而匹

也予嘗為天風遊玉柱訪青

童攀玉女尋子晉之

奇蹤步老翁之幽址捫虎頭

而舒嘯憇黃蓋而徒

倚面玉鏡之光芒盼三鶴之

軒翥過遇聖之浮丘

璠玄龜兮如砥駭卧龍兮之

起雲間跨獅子兮之

會仙侶覓鳳凰兮誰誰灑金



壺兮墨池瞻華蓋兮亭亭呼萬歲兮鼓舞挹玉人  
兮太白眺積翠獨秀兮延佇已而夕陽隱映而卸  
山歸鳥喧囂而投林石狗蹇蹇而四塞蟠踈泯沒  
而曳陰翳鹿相牽而丁友援抗聚嘯而長吟螻蛄  
噪而鳴咽於菟嗥  
悚然而驚矯回首  
之岌業佩長佩之珍  
粹精歷玄冥之微徑而八閭確上征視倏忽而愈遠  
超寥廓於無聲欲從之而不可得乃托長歌而放  
情歌曰嵩山之谷兮肅明嵩山之泉兮澄清泉澄

清兮可濯纓谷虛明兮彷彿蓬瀛追仙翁而馳乎  
難及兮聊徜徉而尋盟載歌曰嵩之山兮儲英嵩  
之神兮效靈神效靈兮海宇平山儲英兮俊駢生  
吾知申甫其復出兮又將為後証

黃河賦

晉成公綏

覽百川之弘壯兮莫尚美於黃河潛崑崙之峻極  
兮世積石之嵯嶸登龍門而南遊兮拂華陰與曲  
阿碣砥柱而激湍兮踰汭洛而揚波躡委蛇於后  
土兮配靈漢於穹蒼貫中夏之畿甸兮經朔狄之  
遐荒歷二周之北境兮流三晉之南鄉泰自西而

啓壤乎齊挾東而晝疆既徒涉而求固衛遷濟而  
遂強趙決流而却魏羸引溝而滅梁思先哲之攸  
歎何水德之難量

同題有序

劉咸

黃河為四瀆之宗其源流之遠蓋不可與尋常溝  
壑並論古今博物之士多有賦詠予承命之官河  
南覽其勢之浩浩歎本之淵淵因為之賦以續于  
後賦曰

究物理於五行願神志於群籍信水類之浩繁各  
流形而不一或溶漾如天青或澹泞如雲碧或泓

沈如練光或緋紅砂赤或清澗如藍或黯黑如漆  
或澄澈如鑑或沸湧如炙凡若此之云云皆可數  
而歷歷者也惟大河之一泓獨殊類於百川如濫

觴於一勺終潤澤乎八埏庶連渤澥名播于闐不

朱不

紫匪綠匪玄本后土以為色假流沙而作摧

因九曲以成勢與三瀆而齊肩漢納其腹離沮其  
咽濟潔其涕濤消其涎羗晨晡之陰霽借氣象之  
萬千爾其發源崑崙匯流葱嶺消滴所生日寢月  
盛自剛山北流千里而西至於蒲山之陽自蒲山  
南流千里而東入乎華陰之境蓄豪悍之騰威乃

齟齬而未逞忽孽崖而奔開恣一馮於俄頃洶湧  
澎湃跳躑馳騁悟然若月窟之舞霓裳粲然若天  
機之下雲錦炯然若鎔金之浴範圍翦然若蠻烟  
之出火并勃然若驟雨方至而電驚雷震鏘然若  
大樂將終而金聲玉振突然若萬騎出驅以奉諸  
將之令哮然踞虎相鬪以奪一時之命使智者遇  
之不能不為之昏昏而勇者見之亦不得不為之  
凜凜也已而離西域窺中原出秦壤趨禹門繞潼  
關之金陵割砥柱之靈根通溼潤兮函谷匯伊洛  
兮孟津接淮泗兮頽上會江漢兮海濱牛馬之去

來兮莫辨涇渭之混淆兮不分魚龍之變化兮莫  
測蛟鼉之出沒兮無倫吐虹蜺兮吞日月噴雲霧  
兮浮乾坤蓋至此而大河之勝有不可得而形容  
於言矣於是奮餘威厲鉅鈔浩浩湯湯膠瀾瀾瀾  
未雨而鬼恠百呈無風而神濤自作歛而為端散  
而為沫瀦而為淵注而為壑澄一之而不清撓之而  
不濁增之而不盈減之而不涸遇溝坡兮委填遇  
丘陵兮開鑿遇夷壤兮潰流遇畔岸兮激搏群山  
羅列兮不能留積石嵯峨兮不能遏泥以昏滓兮  
不能壅大澤瀾漫兮不能括盛矣哉其量之同乎

太虛淵矣哉其沈涵乎冲漠樞矣哉其勢之連乎  
滄溟壯矣哉其聲之動乎寥廓意者其天地之氣  
機而造化之脉絡耶意者其方輿之心胸而湖海  
之邪廓耶不然何寬何洪衆流必容何去何從萬  
折必東由中潤下而不厭履險涉難而皆通誰其  
逼之忙忙忽忽誰其逆之滂滂颯颯流晝夜而不  
息亘古今而不窮吾亦不自知其於世界與何物  
而爭雄宜乎魏國美之以為寶漢家以之而擗功  
也思昔洪流滔天不辨區域馭九州之一豬皆  
浸淫而洋溢惟禹聖人繼天立極慨兩儀之混茫

念群生之昏溺乃刊木而隨山因順流而疏滌雖  
手足之胼胝三過其門而不入九載勤勞厥功斯  
畢然後地平天成烝民乃粒舟楫以之而通貨財  
由之而殖歷世相承至有今日然則論河之功可  
不知禹之力哉欽惟

國家奄有家區車書混一海宇晏如恩波之所及德  
澤之所敷罔不率俾來貢來輸故斯河也有帶礪  
之固無汎濫之虞迨今寧謐五十年餘每澄清考  
見底輒決旬方不汚愚也何幸身逢承平之盛世  
而因觀乎禎祥之屢書慶千載風雲之嘉會得乘

一控於斗牛之墟爰摭載而獻賦聊以效夫龍馬  
之呈圖

同題

薛瑄

吾觀黃河之渾渾兮乃元氣之萃蒸濬洪源於西  
極兮注天派於滄瀛貫右土之龐博兮沓玄溝之  
晶明過積石而左轉兮龍門呀而峻傾薄太華而  
東駕兮撼天柱之崢嶸入大陸而北徙兮迷不辨  
夫九河之故形經兩海而紀衆流兮擅浮沉之濯  
靈覽頽波而懷明德兮又何莫非似氏所經營登  
崑崙而俯視兮因彷彿其初迹馭高風而騁望兮

遂周游其曲直何末流之混濁兮始清激而湜湜  
羗澹灑而徐趨兮勢茫茫而自得觸險石以鬪暴  
兮詫雷轟而數擊天宇擴其沆莽兮漱上下之玄  
黃霧雨露霏而滂集兮混遂古之洪荒微風蕩拂  
而渙散兮天<sub>絨</sub>織其文音頽森浩而洶湧兮百  
恠垂涎而簸揚腥雲濁浪以盪汨兮徒惚顛倒乎  
舟航靈曜升而赫照兮秉正色於中央望舒在御  
而下臨兮列宿涵泳其光芒若乃震秉符以行令  
兮百谷滂滂其凍釋山澤如以上氣兮增澆濘之  
洋溢魚龍乘濤以變軀杳莫測其所極祝融載節

以南屬雷雨奮達以雲霧漢支流而股合兮百川  
奔而來會輪因而漂拔兮蔽雲日其洶汰狂瀾洶  
而鑿岸兮塊土焉塞天衝潰霜威嚴而木脫兮以  
昊孰矧以司秋洲渚緬邈而石出兮始殺湍而安  
流震雪紛其四集兮顛頊乘坎以奮神大塊噫氣  
而摩軋兮流澌下而龍鱗層冰橫絕而山委兮河  
伯驅石以梁津羗險夷而明晦兮變朝暮與四時  
颶風起而衝目兮莽恠駭其難推觀圖方之一氣  
兮恒來往而密移昔尼父之歎逝跨百世而罕知  
信川流之有本兮與終古以為期啓龍圖而翫六

一兮悟不幸之所為喟余未純兮感之如

斯聊誦言以自明兮庶晝夜之匪虧

龜窩賦

柳陽曹璉僉事

按河南永寧縣誌云禹治水功成神龜負文出於  
邑之洛川歷千萬年其窩儼然尚存予恐未的乃  
駕舟往造其地觀之果如所載不爽遂作龜窩賦  
以紀之

繫陶唐之初時兮陞江河之未鑿茫洪水之氾濫  
兮蕩民居之蕭索賴虞舜之圖治兮躬謙虛而咨  
四岳僉於是而薦禹兮堪勝夫斯命之托禹傷鯀

之汨陳兮果勤渠而允若隨山川而刊奠兮順水  
性而疏濬雖手足之胼胝兮猶朝濟而暮鑿恒三  
過其門問兮未一入而休泊歷八代之難險兮功  
乃成而告芟感穹昊之昭格兮錫神龜之出洛背  
負文而璀璨兮宵蠖略宛轉以顯顯毓元氣之淋  
漓兮含亭毒之化工禹默契其旨兮發闕灵於鴻  
濛因其數畫而次第兮按八卦而分九宮彼戴元  
履一兮象首尾之始終彼左三右七兮衍輔翼之  
相後肩二一足六八兮而五獨居夫其中此洛書  
之貫粵兮匪聖知孰啓乎愚衷嗟事雖載于壽簡  
兮而跡則未究其實心快快于周流兮傳追訪而  
未的偶承乏而觀風兮跨青駝而巡歷自蒿菴而  
之永寧兮望長洲之洋溢乃命駕彼絲鷁兮泝流  
光而遊息堪平瀾之淵泓兮澹輕煙之忽翕以馬  
抵一沙渚兮懸兩岸之壁立蕙若披香蒹茵襯碧  
紛鳧鷖鴻鴈之翱翔駘龜鼉虬蜃之出沒暫停擢  
延佇以尋訪始覲夫龜宮之秘頤氣綢緼而上蒸  
形偃仰而昭晰孰眎其躡蹠貽睦其呵衛意其非  
天錫之休徵必地產之靈異不然何怒濤不能衝  
流沙不能積左盤右旋前踳後踞而千萬年如一

日也哉

屬校卷之三

河南郡志卷之三十二

河南郡志卷之三十三

東嘉陳宣監脩

洛陽喬縉編集

占滕崔譽

東鄞厲仲彰

同校

歌

祀洛水歌

古今樂府錄云秦始皇祀洛水有黑頭公從河中出謂始皇曰來受天室乃與群臣作歌

洛陽之水其色蒼蒼祠祭大澤倏忽南臨洛濱醴



禱色連三光

洛陽令歌

漢史

長沙耆舊傳曰祝良字石卿為洛陽令歲時亢旱天子祈雨不得良乃暴身階庭告誠引罪自晨至午雲烟四起廿雨遂降人為之歌云

天久不雨丞人失所天王自出祝令特苦精符感應滂沱下雨

董少平歌

後漢書曰董宣字少平光武時為洛陽令搏擊豪強京師號為臥虎而歌之云

桴鼓不鳴董少平

五噫歌

梁鴻

三輔決錄云梁鴻東出關過洛陽作五噫之歌肅宗聞而悲之求鴻不得

陟彼北邙兮噫顧瞻帝京兮噫宮闕崔嵬兮噫民之劬勞兮噫遼遼未央兮噫

洛中之水歌

梁武帝

河中之水向東流洛陽女兒名莫愁十三能織綺十四采桑南陌頭十五嫁為盧家婦十六生兒似阿侯盧家蘭堂桂為梁中有鬱金蘇合香頭上金釵十二行足下錦履五文章珊瑚挂鏡爛生光平頭奴子擎履箱人生富貴何所望恨不早嫁東家王

得寶歌

隋王通

得寶弘農弘農寶耶潭裏船車開揚州銅器多三  
郎當坐聽唱得寶歌

湖城遇孟雲卿醉歌

湖城在

唐杜甫

疾風吹塵暗河縣行子隔手不相見湖城城南一  
開眼駐馬忽識雲卿面况非劉顥為地主嬾迴鞭  
轡成高宴劉侯嘆我携客來置酒張灯促華饌且  
將疑曲終今夕休語艱難尚酣戰照室紅爐促曙  
光縈窓素月垂文練天開地裂長安陌寒盡春生  
洛陽殿豈知驅車復同軌可惜刻漏隨更箭人生  
會合不可常庭樹雞鳴淚如綫

下山歌

唐宋之問

下嵩山兮多所思携佳人兮步遲遲松間明月長  
如此君再遊兮復何時

和

唐王無競

日云暮兮下嵩山山路連綿兮樹石間出谷口兮  
見明月心徘徊兮不能還

金銅仙人辭漢歌

唐李賀

魏明帝都洛陽時青龍元年八月詔官軍牽車西取  
漢孝武捧露盤仙人欲立置前殿官官既拆盤仙  
人臨載潛  
然淚下

共、凌劉郎秋風客夜聞馬嘶曉無跡畫蘭桂樹懸  
秋香三十六宮玉花碧魏官牽車指千里東閣酸  
風射眸子空將明月出宮門憶君清淚如鉛水衰  
蘭送客長安道天若有情天亦老携盤獨出月荒  
涼渭城已遠波聲小

前尹歌

李叔明閩州人擢明經拜洛陽令  
遷京兆尹民為之作歌終太子太傅

前尹赫赫具瞻允若後尹熙熙具瞻尹斯

金谷步障歌

元楊廉夫

金谷水派銀河流金谷峙據三神立太僕卿君十

二樓花山早不識人間秋蜀江染絲紅五色紫鳳脚

絲終夜似緞剪斷鯨濤三萬匹天女江妃不敢惜明

珠量斛田只蛾眉時時玉笛障中吹紅鷺翠鸛飛在

地香塵阻羽蹋凝流脂野鷹西來歌吹歇踏錦未收

風雨裂罅以前甲士屯如雲樓上佳人墜如雪於乎

董家郁岵四金成泥鬼燈一點燃空臍齊州奴何用

尔只須豆一粥與萍蓬不見祗今金谷底野花作障

山禽啼

喬家妾歌 洛陽喬知之妻

石家有綠珠喬家有碧玉顏色上春花節操文貞  
木金谷樓鸚鵡井一双白壁沉倒影

國朝

汚池驅虎歌

王禕 待制金華人

洪武四年四月括蒼王侯熙陽為丞於汚池先是境內虎害人者無虛日民以為患侯至則為文與城隍神自今以後虎不  
去即不去責且有所歸言甚激切而果絕迹民以為王侯德化  
之所致也余道經汚池日繫其事因為作歌

汚池之境日取多虎道路行人共愁苦狂風吼怒振  
塵沙落日為魂慘烟雨王侯承認來作丞民有瘡  
瘻手摩撫下車走謁城隍神親寫移文對神語為

言半顯雖有分我與尔神均守土猛虎今茲實  
人責不在予選在汝早遣惡類離境中尔神無愧  
為民主精誠一念既感孚陰逐潜驅固其所驛使  
郵夫中夜馳畊農商客凌晨聚前時出户即畏塗  
今日連村皆按堵童謡藉藉相謂言孰使吾人樂  
居處我侯之德與神通故令孽沴成銷沮豈不見  
古來循吏美頭多虎有渡江及渡河汚池之事固  
不磨王侯王侯奈尔何

白馬寺浮圖歌

崔譽

洛東古寺高日一雄樓飛閣舞來空中千金不惜起

雕飾丘山土亦勞人功可憐寺僧懷義死焚尸不  
忍棄灑水聚骨深藏厚土中百丈浮圖倚雲起浮  
圖猶在唐祚移今年秋雨忽傾夷好收磚石砌墻  
脚莫遺當時女主知

望仙臺歌

厲仲彰  
鄆縣人

望仙臺高幾重昔年突兀今已空漢文皇帝慕仙  
風當時親謁河上公授以道德經未終乘雲一去  
杳無蹤須臾忽相失不覺熱我衷故築斯臺望不  
窮仙公仙公須歸來携手還相從刀圭入口顏長  
紅

行

驅車上東門行

石陽  
不門

選詩

驅車上東門遙望郭北墓白楊何蕭蕭松柏夾廣  
路下有凍死人杳杳以長暮潛羅黃泉下千載永  
不寤浩浩陰陽移年命如朝露人生忽如寄壽無  
金石固萬歲更相迭豈只聖莫能度服食求神仙多  
為藥所誤不如飲美酒被服純與素

扶邪行

晉陸機

伊洛有岐路岐路交牛不輪輕蓋承華景騰步躡飛  
塵鳴玉豈樸儒憑軾比日俊民烈心厲勁秋麗服鮮

芳春余本倦遊客亦立  
多舊親傾蓋承芳訊欲鳴  
當及晨守一不足於岐  
路良可遵規行無曠迹  
步豈遠人投足緒已  
四時不必循將逐殊途軌  
要子同嶺津

狹斜行

梁武帝

洛陽有曲陌曲曲不  
通驛忽遇二少童扶轡問君  
宅我宅耶郭右易憶  
信復可知大息組網  
中息佩陸離小息尚  
青綺總角遊南陂三  
息俱入門家臣拜門  
垂三息俱升堂五日  
酒盈千危三息俱入  
戶戶內有光儀大婦  
理金翠中婦事玉鱗  
小婦

調笙遊曲池丈人少徘徊鳳吹方參差

洛陽公子行

陳劉希

天津橋下洛陽水天津橋上繁華子馬聲迴合青  
雲外人影搖颺綠波裏綠波清迴玉為砂青雲離  
披錦作霞可憐楊柳傷心樹可憐金谷桃李斷腸  
花此日遨遊邀美女此時歌舞入娼家娼家美女  
鬢金香老去飛來公子傍的的珠簾白日映娥娥  
玉顏紅粉粧花際徘徊雙蛺蝶池邊顧步兩鶯鶯  
傾國傾城漢武帝為雲為雨楚襄王古來客志人  
所羨况復今日遙相見願作輕羅著細腰願為明

鏡分嬌面與君相向枝相親與君双栖共一身願  
作貞松千萬古誰論芳槿一朝新百年同謝西山  
日轉眼萬古北邙塵

永嘉行

懷帝永嘉六年劉曜陷洛陽  
害諸王公三萬餘人遷帝洛陽

唐張籍

黃頭鮮卑入洛陽胡兒持戟昇明堂晉家天子作  
降虜公卿齊走如牛羊紫陌旌幡暗相觸家家鷄  
犬驚上屋婦人出門隨亂兵夫死眼前不敢哭九  
州諸侯自曠土無人領兵來護主北人避胡多在  
南南人至今能晉語

洛陽行

張籍

洛陽宮闕當中州城上峩峩十二樓翠華西去幾  
時返鳥巢乳鳥藏螿燕御門空鎖五十年稅彼農  
夫修玉殿六街朝暮鼓鼙變禁兵持戟守空宮百  
官月月謝瑛表驛使相續長安道上陽宮樹黃復  
綠野射入院食麋鹿陌上老翁空淚垂共說武皇  
巡幸時

北邙行

唐張碧

風昏晝色飛斜雨冤骨千堆觸髅語八紘宇落入  
物悲是箇田園荒廢主悲絕自古爭天下幾度乾  
坤復如此秦皇矻矻築長城漢祖區區自忙死野

之骨兮又成塵樓閣風烟兮還復新願得華山兮  
長歸馬野田無復堆冤者

北邙行

張籍

洛陽北門北邙道喪車磷磷入秋草車前齊唱薤  
露歌高墳新起白峩峩朝朝暮暮人送葬洛陽城  
中人更多千金立碑高百尺終作誰家柱下石山  
頭松栢半無主地下白骨多於土寒食家家送紙  
錢烏鴉作窠街上樹人居朝市未解愁請君暫向  
北邙遊

董逃行

洛陽城頭火曠曠亂兵燒我天子宫宮城南面有深  
山盡將老幼藏其間重巖為屋丘塚為食丁男夜行候  
消息聞道官軍猶掠人舊里如今歸未得董逃行  
漢家幾時重太平

北邙行

唐王仲初

北邙山頭少閑土盡是洛陽人舊墓舊墓人家婦  
葬多堆着黃金無置屢天涯悠悠葬日促岡坂崎  
嶇不停轂高張素幕繞銘旌夜人唱挽歌山下宿洛  
陽城北復城東魂車祖馬長相逢車轍廣若長安路



蒿草多於松柏樹澗底盤陀石漸稀盡向墳前作  
羊虎誰家古碑文字滅後人重取書年月朝朝車  
馬送葬回還起大宅與高臺

洛陽女兒行

唐王維

洛陽女兒對門居纔可顏容十五餘良人玉勒乘  
總馬侍女金盤贈鯉魚畫閣朱樓盡相望紅桃綠  
柳垂簷向羅幃送上七香車寶扇迎婦九華帳狂  
夫富貴在青春意氣驕於石季倫自憐碧玉親教  
舞不惜珊瑚持與人春窓曙滅九微火春花片片  
飛青瑣戲罷曾無理曲時妝成秋是薰香坐城中

相識盡繁華日夜經過趙李家誰憐越女顏如玉  
貧賤江頭自浣沙

綠珠行

元楊庶夫

主家高樓起金谷買妾不惜玳珠斛美人買得一  
片心不買青眉與明目手持玉笛吹鳳凰誓與蕭  
史雙頰頰樓頭侍宴宴未徹甲光一片樓前雪神  
珠一點擲盡欄化作流星光不滅於平珊瑚步障  
裂行人弔珠在古井井中照得青天月石家妾石  
家哭二十四人金谷友八驕道旁方拜覆

國朝

古北邙行

清江彭綱

古來北邙山盡是貴人墓  
秋今犁作土人田禾黍  
茫茫產租賦生前競詫中  
朝豪死後擬保南山固  
翁仲俄成野燒灰金玉為  
貯偷兒庫市中古鏡晃  
日星地下空棺棲狐兔誰  
家新墳絕幾年土石欲  
陷豐碑仆德涼澤薄凋兒  
孫業易主更悲道路山  
頭日日轉靈輶落鋪多逢  
舊埋處從今視昔總堪  
哀人家空起高門戶君不  
見洛陽城裏甃地磚都  
去邙山乞來做

龍門行

彭綱

龍門兩山相對峙龍門河水流  
山裏龍門天造非禹功獨向中  
州擅山水憶昔周公營洛都陰  
陽險阻歸謀謨炎劉典午御區  
宇亦來闕塞陳基圖拓跋何人  
羶中國豔妻媚佛禍山石洞中  
大像高幾尋山間小者亦數尺  
當時椎鑿斷民脂萬金不恤窮  
妖竒誰知佛死無靈氣諸魔依  
託猿夜啼右擊疑鼓左疑鑼神  
州漸見交兵戈梁皇餓死金人  
在魏國分崩石佛多我來問俗  
偶登眺坐觀今古嗟一咲東山  
淑窈西山開忽聽漁舟崖下叫

洛陽古城行

崔譽

秋風習習秋日涼驅車役役經洛陽洛陽古人不可見但見洛水流洋洋城中種田少民屋纍纍多是白楊墓晉唐樓閣化為埃女墻踏作行人路群鴉飛處多蒿萊夕陽閃閃鳴聲哀人生莫道常少小今日不如昨日好

鳳凰臺行

厲仲彰

鳳兮去已久此地遺荒臺世傳無所徵令我生疑猜一自遊阿閣還集岐山隈雖云叶漢瑞千年能幾回隱現各以時覽德猶徘徊

聖人今在上和氣蒸九垓梧桐豈不長竹實亦纍纍  
鳳兮須有靈早晚還飛來

辭

龍馬辭

伏羲氏

惟天至仁於草生月天雨降河龍馬負圖神開我心  
見古三墳

王子喬辭

晉古辭

王子喬騰駕白鹿雲中遨  
王子喬騰駕白鹿雲中遨  
下遊來王子喬騰駕白鹿上至雲戲遊遨上逮逋陰廣里漸近高結仙宮謁三台東遊四海五嶽山過蓬

荆紫雲臺三王五帝不足今令我聖朝應太平養  
民若子事父母當究天祿永康寧玉女羅坐吹笛  
簫嗟行聖人遊八極鳴鳶御福翔歿側聖主享萬  
年悲吟皇帝延壽命

連昌宮辭

唐元稹

連昌宮中滿宮竹歲久無人森似疎又有牆頭千  
葉桃風動落花紅簌簌宮邊老人為余泣少年選  
進因曾入上皇正在望仙樓太真同凭闌干立樓  
上樓前盡珠翠炫轉輝煌照天地歸來如夢復如  
癡何暇備言宮裏事初過寒食一百六店舍無烟

宮樹綠夜半月高絃索鳴賀老琵琶冠塲屋力士  
傳呼覓念奴念奴潛伴諸郎宿湏臾覓得又連催  
特勅街中許然燭春嬌滿眼睡紅綃掠削雲鬟旋  
粧束飛上九天歌一絃耳二十五郎吹管逐逡巡大  
編梁州徹色色龜茲真鞞錄續李摹摩笛傍宮牆偷得  
新翻數般曲平明大駕發行宮宮人鼓舞途路中  
百官隊仗避岐薛楊氏諸兒車闐風明年十月東  
都破御路猶存祿山過驅令供頓不敢藏萬姓無  
聲淚潛墮兩宮定後六七年却尋家舍行宮前莊  
園燒盡有枯井行宮門闥樹宛然亦後相傳六皇

帝不到離宮門久閉往來年少說長安玄武樓成  
花萼廢去年敕賜因研竹偶值門開整相逐荆榛  
櫛比塞池塘狐兔嬌凝綠樹木舞榭歌傾基尚存  
文窓窈窕紗猶綠塵埋粉壁舊花鈿鳥啄風箏碎  
珠玉上皇偏愛臨砌花依然御榻臨堦斜蛇出燕  
巢盤闔拱菌生香案正當衙寢殿相連端正樓太真  
梳洗樓上頭晨光未出簾影黑至今反掛珊瑚鈎  
指示傍人因慟哭却出宮門淚相續自從此後還  
閉門夜夜狐狸上門屋我聞此語心骨悲太平誰  
致亂者誰翁言野父何分別耳聞目見為君說姚

崇宋璟作相公勸諫上皇言語切愛理陰陽未悉  
豐調和中外無兵戎長官清平太守好揀選皆言  
由至公開元款木姚宋死朝廷漸漸由妃子祿山  
宮裏養作兒號國門前開如市弄權宰相不記名  
依稀憶得楊與太子廟謨顛倒四海搖五十年來作  
瘡痍今皇神聖必相明詔書終下吳蜀平官軍又  
取淮西賊此賊亦除天下寧年年耕種宮前道今  
年不遣子孫耕老翁此意深望幸努力廟謨休用兵

篇

關鷄篇

魏都洛陽明帝禁關鷄墓趙王  
石虎以羽林關鷄于此

魏曹植

遊目極妙伎清聽厭宮商主人寂無為衆賓進樂  
方長筵坐戲客闕鷄觀間房群雄正翕赫雙翅自  
飛揚長鳴入青雲羽翼獨翱翔顧蒙狸膏助常得  
壇此場

京洛篇

晉鮑昭

濟濟京城內赫赫二侯居冠蓋蔭四野朱輪翳長  
衢朝集金張館暮日許史廬南隣擊鍾磬北里吹  
笙竽

引

緱山引

王子吹笙去不還當時舊物惟緱山山深樹老藏  
遺廟秋月春風空自閑轅轅左界連商維碧尾朱  
欄露華薄經時掩戶庭草深永晝無人對花落排  
徊未下日將西遙望嵩陽烟景微鶴馭飄飄向何  
許林間空見白雲飛

唐宋之問

王子喬愛神仙七月七日上賓天白虎鼓瑟鳳吹  
笙乘騎雲氣吸日精吸日精長不歸遺廟今在而  
人非空望山頭草草露濕君衣

吟

白頭吟

宋之問

洛陽城東桃李花飛來飛去落誰家  
幽閨兒女惜顏色坐對落花長嘆息  
今年花落顏色改明年花開復誰在  
已見松柏摧為薪更聞桑田變成海  
古人無復洛城東今人還對落花風  
年年歲歲花相似歲歲年年人不同  
寄言全盛紅顏子須憐半死白頭翁  
此翁白頭真可憐伊昔紅顏美少年  
公子王孫芳樹下清歌妙舞落花前  
光祿池臺文錦綉將軍樓閣畫神仙  
一朝臥病無相識三春行樂在誰邊  
婉轉娥眉能幾時須臾鶴髮亂如絲  
但見古

來歌舞地惟有黃昏鳥鵲飛

謡

緱山謡

元張全進士

緱雲輕緱月明緱山仙人弄雲月徘徊  
鶴吹玉笙仙人忽輕舉山頭雲月悠悠薄  
太清浮丘真人學道成丹砂九轉飛零星  
羽衣芝蓋遙相迎游軒駕鳴相與朝玉京  
海日岩峩射青闥霞崆峒烘赤城下瞰塵寰  
滄海桑田平紛紛萬兆如癡蠅菌蟪畧促兮  
不暫停大道茫茫兮其自靈故山松桂兮煙冥冥  
邦人思舊兮未忘情香火燁燁兮

祀清明青天寥寥兮望霓旌飲鶴池邊兮幾番  
春草生

曲

王子喬曲

梁江淹

子喬好輕舉不待鍊銀丹控鶴去窈窕學鳳對嶺  
岍山無一春草谷有千年蘭雲衣亡躑躅龍駕何  
時還

國朝

窈窕曲神即洛

崔譽

窈窕弄春風乘舟渡洛水搖搖欲濟溺中流飄蕩

香魂千萬里千里萬里不可知海東一去無回期  
歲月茫茫自昏曉洛神可憐亦幽渺但見波心明  
月小



河南郡志卷之三十四

東嘉陳宣監脩

洛陽喬縉編集

古滕崔譽

厲仲彰

同校

五言古詩

洛陽道

晉陸士衡

總轡登長路嗚咽辭密親借問于何之世網嬰我身  
身求歎邊地渚遺思結南津行行遂已遠野途曠

無人

又

梁車數

洛陽道八達洛陽城九重重關如隱起雙闕似芙蓉王孫重行樂公子好遊從別有傾人處佳麗夜相逢

又

梁沈約

洛陽大道中佳麗實無比燕裙傍日開趙帝隨風靡領上蒲苑綉腰中合歡綺佳人殊未來薄暮空徙倚

又

陳後主

建都開洛汭中地乃城陽縱橫四八達左右闕康莊銅溝飛柳絮坐谷落花光忘情伊水側稅駕河橋傍

凌雲臺在洛陽

梁謝舉

魏志文帝黃初元年初營洛陽宮戊午辛洛陽二年葉凌雲臺劉義慶世說凌雲臺樓觀精巧先稱衆木之耗重然後構無錯鉢相負揭臺高峻恒隨風雨動搖能鑿洛陽記曰凌雲臺高二十三丈登之見孟津也

綺甍懸柱棟隱映見橋河勢高凌五井臨迥度金波易覺涼風至早飛秋鴈過高樓相思曲望遠騷人歌幸屬此迢遞知承雲霧多

經河上公廟

唐玄宗

昔聞有耆叟河上獨遺禁跡與塵囂隔心將道德  
并詎以天地累寧為寵辱驚矯然遯寥廓如何屈  
堅貞玄玄妙門啓肅肅祠宇清冥漠無先後那能  
紀姓名

秋夜宿龍門香山寺

唐李太白

朝發汝海東暮棲龍門中水寒夕波急木落秋山  
空望極九霄迥賞多萬壑通目皓沙上月心清松  
下風玉斗橫網戶銀河秋花宮殿在趣方逸歡餘  
情未終鳳駕憶王子虎溪懷遠公挂枝坐銷歇棣  
華不獲同流恨一寄伊水盈盈馬可窮

題元丹丘穎陽山居

仙遊度潁水訪隱同元君忽遺蒼生望獨與洪崖  
群卜地初悔跡興言且成文却顧此山斷前瞻南  
嶺分遙通汝海月不隔嵩丘雲之子合逸趣而我  
欽清芬舉足倚松石焚談迷朝曛益願狎青鳥拂  
衣棲江濱

石壕吏家在陝州

唐杜子美

暮投石壕村有吏夜捉人老翁踰墻走老婦出門  
看吏呼一何怒婦啼一何苦聽婦前致詞三男鄩

城成一男附書口至二男新戰死存者且偷生死者  
長已矣室中更無人所有乳下孫孫有母未去出  
人無完裙老嫗力雖衰請從吏夜歸急應河陽役  
猶得備晨炊夜久語聲絕如聞泣凶咽天明登前  
途獨與老翁別

新安吏

朝行新安道喧呼聞點兵借問新安吏縣小更無  
丁府帖昨夜至次選中男行中男絕短小何以守  
王城肥男有母送瘦男獨伶仃白水暮東流青山  
猶哭聲莫自便眼枯收汝淚縱橫眼枯却見骨天

地終無情我軍取相州日夕望其平豈意賊難料  
歸軍星散營就粮近故壘練卒依舊京掘壕不到  
水救馬役亦輕况乃王師順撫養甚分明送行勿  
泣血僕射如父兄

遊龍門奉先寺

已從招提遊更宿招提境陰壑生靈籟月林散清  
影天關象緯逼雲卧衣裳冷欲覺聞晨鍾令人發  
深省

龍門鎮

細泉兼輕水如棧道溼不辭辛苦行迫此短景

急石門雲雷隘古鎮峯巒集旌竿暮慘澹風水白  
刃澁胡馬屯成臯防虞此何及嗟爾遠戍人山寒  
夜中泣

洛陽中隱堂

唐白樂天

大隱住朝市小隱入丘樊丘樊太冷落朝市太囂  
諠不如作中隱隱在留司官亦出復似處非忙亦  
非閑不勞心與力又免飢與寒終歲無公事隨月  
有俸錢君若欲登臨城南有秋山君若欲遊蕩城  
東有春園君若欲高卧但自深掩閉君若欲一醉  
時出赴賓筵洛中多君子可以恣歡言人生處一

世其道難兩全賤則苦凍餒貴則多憂患惟此中  
隱士致身吉且安窮通與豐約正在四者間

初到陸渾山莊

唐宋之間

授衣感窮節策馬凌伊閔歸齋逸人趣日覺秋琴  
閑寒露衰北阜夕陽破東山浩歌步岑樾栖鳥隨  
我還

龍門遊眺

唐韋應物

鑿山導伊流中断若天關都門遙相望佳氣生朝  
夕素懷出塵意適有携手客精舍繞層阿千龕隣  
峭壁緣雲路猶緬憇澗鍾已寂花樹發煙華淙流

散石脉長嘯招遠風臨潭散金碧日落望都城人  
間何役役

湖城驛池上亭

唐劉禹錫

秋次池上館林暉照南榮塵衣紛未解幽思浩已  
盈風蓮墜故萼露菊含晚英恨為一夕客愁聽晨  
雞鳴

登陝州樓

獨上百尺樓目窮思亦愁初日遍露草野思先悠  
悠塵息長道白樹清宿煙收回首雲深處未懷帝  
鄉遊

緱山西峯草堂作

唐岑參

結廬對中嶽青翠常在門遂耽水木興盡作漁樵  
言頃來闕草句但欲閑心魂日色隱空谷蟬聲喧  
暮林曩聞道士語偶開清淨源隱几聞吹葉乘秋  
眺歸根獨遊念衰仲開徑招王孫片雨下南澗孤  
峯出東原栖遲慮益淡脫畧道弥敦野藹晴拂枕  
客帆遙入軒尚平今何在此意誰與論佇立雲去  
盡蒼蒼月滿園

蘭昌宮

唐劉駕

宮蘭非瑤草安得春常在回首春又歸翠葉不能

待悲風生輦路山川寧已晦  
遙恨在行人行人無盡歲

晚渡伊水

唐韋述

悠悠涉伊水伊水清見石  
是時春向深兩岸草如積  
迢迢望洲嶼逶迤豆津陌  
新樹落疎紅遙冰上深碧  
回瞻洛陽苑遽有長山隔  
煙霧猶辨家風塵已為客  
登涉多異趣往來見行役  
雲起早已昏鳥飛日將夕  
光陰逝不惜超然暮疇昔  
遠遊亦何為歸來存竹帛

讀書堂

以下七詠皆在獨樂園

宋司馬光

吾愛董仲舒窮經守幽獨  
所居雖有園三年不遊目  
邪說遠去耳聖言飽充腹  
發策登漢庭百家始消伏

釣魚庵

吾愛嚴子陵羊裘釣石瀨  
萬乘雖故人訪求失所在  
三旌豈非貴不足易其介  
奈何夸毗子斗祿窮百態

采藥圃

吾愛韓伯休采藥賣都市  
有心安可欺所以價不二  
如何彼女子已復知姓字  
驚逃入窮山深畏名

為累

見山臺

吾愛陶淵明拂衣遂長往  
手辟梁主命犧牛悼金  
鞅愛吾心豈忘居山神  
可養輕舉向千齡高風  
猶尚想

弄水軒

吾愛杜牧之氣調本高逸  
結亭侵水際弄流消  
求日洗硯可抄詩泛觴  
宜促膝莫取濯冠纓紅  
塵汙清質

種竹齋

吾愛王子猷借宅亦種竹  
一日不可無潇洒常在  
目雪霜徒自白何葉不  
改綠殊勝石季倫珊瑚  
滿金谷

澆花亭

吾愛白樂天退身家履道  
醺酒酒初熟澆花花正  
好作詩邀賓朋攔邊常  
醉倒至今傳登圖風流  
稱九老

穎大夫廟

宋蘇東坡

人情難強回天性可徵  
感世人爭曲直苦語費  
搖撼大夫言何柔暴主  
意自慙荒祠旁孤塚古  
隧有



殘坎千年惟茅焦世亦貴其膽不解此微言脫衣  
徒勇敢

司馬君實獨樂園

東坡

青山在屋上流水在屋下中有五畝園花竹秀而  
野花香襲杖屨竹色侵盞斝樽酒樂餘春棋局消  
長夏洛陽古多士風俗猶爾雅先生卧不出冠蓋  
傾洛社雖云與衆樂中有獨樂者才全德不形所  
貴知我寡先生獨何事四海望陶冶兒童誦君實  
走卒知司馬持此欲安歸造物不我舍名聲逐我  
輦此病天所赭撫掌笑先生年來效暗啞

天津橋晚步

宋邵雍

芝蓋久稀踈暮雲空决北千年舊都城一片閑宮  
闕禁藥尚連延舳舻猶巖嶸橋勢橫雌霓隄形偃  
初月灑澗岸已深漢唐時既散危亭独坐人浪把  
興已闕

題潁谷純孝伯廟壁

元好問

洩洩潁谷雲瀦瀦潁川水封君去我又水雲自清  
美人言君善諫微意得鄭子特於梅悟時一語發  
天理大孝勒金石上直及頑鄙反身而未誠善諫  
且敗矣如何千歲下乃與茅焦比我行潁水邊求

念負甘旨願作鯉與鮒因之日千里

國朝

張良

錙師邵洛陽

嬴氏并六國嚴刑滋暴強坑焚愚黔首此計謂已  
良六籍等灰飛烈燄亘天長一編獨見遺乃為黃  
石藏孺子三失期夙夜心孔惶圮橋持見授服膺  
敢遺忘鍊椎報韓雋大索徒周章赤龍握乾符志  
願竟得償此道能茲畢禮樂可更張儒冠乃見溺  
兩生卒迴遑檢斯術何師投閭亦罹殃著書擬立  
軻謬哉苟與揚明哲保厥軀辟穀事仙方善知持

足戒千載道弥光

銅駝巷

劉咸

古巷乃隘陋猶說銅駝名想當炎漢日冶工鑄始  
成首山化金波崇谿泄金精洪爐氣磅礴烈火光  
晶瑩煇韜神力助鉗椎鬼鬼驚拱衛擊五雷呵護  
煩六丁猙獰異獸出繚繞長虹縈千年鎮厚土留  
茲洛陽城摩挲幾嘆息會見荆棘生山海有傾竭  
陵谷多變更詩人重紀述感激傷吾情茫茫付陳  
迹餘憤何由平

脩吏解

陳宣

府史日百供文移准而叢所居不自覆誰蔽雨與  
風昨者心惻然規畫自吾中上棟下而宇連雲百  
什宮官不知其始民不知其終儼如蜂絡穴門巷  
異而同出入以相守慎勿忘而公天道知不速錫  
福爾其逢我言汝當聽或可告來聰

掩骼為賦王百戶

喬縉

餓殍盈塗積皇皇飢饉時洛人皆菜色秦隴俱流  
離樹皮剥烹盡六畜無子遺斗米千錢直衣裳貨  
莫披兄既齧其弟母亦食其兒相食為日久困憊  
多傾危既死無轡輶暴露城北基裸形鴉犬啄蕩

折臨路垂骨肉眩天地臭穢觸神祇藩伯來給賑  
見之潸然悲犬尚有蔽蓋馬死亦有帷如何積尸  
衆掩骼胡不為王君承委命夙夜莫之遲畚鍤力  
埋塵作此巨坑陂推運入深塹百萬一時移堅築  
成丘塚豎以漏澤碑掩骼奉春令不為爾有知惟  
祈年谷盛人人獲壽祺

過王弼墓

程蘭

偃師城門東有墓高且大隧道立豐碑事實後人  
載云是魏王弼世遠名猶在妙手註易辭理趣深  
可愛名與鍾會齊文采更豪邁夫靈死不泯稍稍

見竒怪陰致陸士龍冥談至夜入草莽繞荒丘歲  
月幾更代我行過墓前仰德良臣拜忽憶雍門言  
悽然發長嘸

過新安讀韓王擒虎碑

崔譽通後共

蒺藜滿砂磧路有韓王碑下馬撫莓石吊古情不  
羈寒鴉集枯柳古塚多累累當千躍鐵馬滅陳乃  
為隋一曲後庭花遂使國政隳可憐清夜遊旋踵  
相追隨六朝杳如夢離離禾黍黍淒涼千古蹟徒  
使後人悲

會盟臺

王網久不振群豪起爭雄爪牙各相攫掄兵兩不  
容青山列紅幟戰鼓夜西東矢石殞生命金戈變  
腥風幾為烏鷲肉鬼哭明月中撫劍不相下其心  
辭冲冲時有主盟者歃血誓始終一朝結情好幣  
走車馬通天運有代謝忽成衰老翁榮華坐消歇  
霸業尋已空空遺一丘七夕陽千載紅

過金谷園

李倫置金谷明璫買紅粧高樓捲珠箔風傳羅綺  
香齊歌雜趙舞妬寵爭風光銀甲美瑤瑟羅裾款  
鳴璫金街躍寶馬豪貴傾洛陽不知日月疾秣謂

日月長傍人起情奪謔巧使趙王一朝甲士至絃  
絕罷笙簧紅粧各匿命綠珠抱郢亡死亦竟何補  
辛成戚族殫爭如梁鴻妻黑醜果何妨過此增浩  
嘆千載梨人腸西風古城道萋萋秋草黃

望嵩山懷仙作

兩洗青天廓孤嶼當眼前白雲去復返來栖松樹  
巔我欲擷芳草尋幽過碧川惆悵日將夕子喬雲  
外仙

洛河泛舟

三川有清洛東去日悠悠古時流不盡今日還復

流砂鳥宿不起蓼花映汀洲秋風吹急景白浪打  
船頭醉中發長嘯心歸天際遊

嚴子陵廟

厲仲彰題

故人垂六龍赤符正煌煌鋤奸盪氛穢八表開重  
光諫垣豈無人此意不能忘龍節照江水再聘方  
翱翔一見叙疇昔共榻情何長不謂動星象太史  
進封章拜官竟不屈益見道義昌此地有遺祠雲  
山亦蒼蒼我來一瞻拜清風生八荒

秋仁傑墓

嗟嗟秋梁公曠世不易得所會非其時妖物御宸

極天忘實有在兢兢盡臣職遂子乃何心欲移唐  
社稷能統房陵還於馬運籌策隻手拓青天廟堂  
鎮柱石出入三十年功名昭簡冊下馬吊孤墳荒  
丘蔓荆棘感我一題詩悲風起蕭瑟

登緱山

巖巖無所適偶登緱氏山板步凌巉岩道遙度仙  
關正會三花開瑤草春斑斑矯首望八極青天如  
可攀忍逢王子晉携手松樹間遺我一九藥云可  
駐紅顏臨岐倏不見失笑歸塵寰

謁二程先生祠

大道在人寰相傳有統公周孔乃其宗軻死誰復  
繼文晦固當明二公出此州世翱翔群聖間佩服仁  
典義闡揚昔未發著述覺來裔用捨隨其時兄弟  
同一致名教賴維持皇天豈無意異端與邪說到  
今不敢耽愚也生已晚私淑久瞻企幸拜古祠前  
春風香無際

玄澗水 在未寧

玄澗一派水源出陽虛山而與洛水通至今流潺  
潺大禹告功成神龜出其間負書丹甲文悠揚戲  
波瀾取之叙九疇此教莫可刪無乃天地秘呈露

可斑斑聖人久不作令人發長嘆

東嶽廟

在洛城東

喬縉

石視臨古道古廟耀山碧洛水底崖下蒼松植四  
壁凌高虛殿閣像表著靈跡風雨應誠禱明裡自  
風昔嘗聞季氏族今又盛春夕神不享非礼何復  
薦瑤席

河南郡志卷之三十四